

眾惡業不信三寶，隨虛妄見棄背正理愛樂邪徒，謗毀佛經言非聖說，外道典籍恭敬受持，自作教人俱生迷惑，當墮地獄無有出期，設得為人生八難處，遠離正道盲無慧目，如是之人若聞我名至心稱念，由是力故臨命終時，正念現前解脫眾難，常生中國受勝妙樂乃至菩提。

曼殊室利，是為彼佛如來應正等覺，行菩薩道時所發四種微妙大願。曼殊室利，彼佛國土功德莊嚴，與上妙寶如來世界等無有異。復次曼殊室利，東方去此過十萬伽河沙佛土，有世界名淨琉璃，佛號藥師琉璃光如來，應正等覺。曼殊室利，彼佛世尊從初發心行菩薩道時，發十二大願，云何十一。

第一大願，願我來世得菩提時，自身光明照無邊界，三十二相八十隨好莊嚴其身，令諸有情如我無異。

第二大願，願我來世得菩提時，身如琉璃內外清徹，光明廣大遍滿諸方，焰網莊嚴過於日月，鐵圍中間幽冥之處互得相見，或於此界閻夜遊行，斯等眾生見我光明悉蒙開曉，隨作眾事。

第三大願，願我來世得菩提時，以無量無邊智慧方便，令諸有情所受用物皆得無盡。

第四大願，願我來世得菩提時，若諸有情行邪道者，悉令遊履菩提正路，若行聲聞獨覺乘者，亦令安住大乘法中。

第五大願，願我來世得菩提時，若諸有情於我法中修行梵行，一切皆令得不缺戒，善防

三業無有毀犯墮惡趣者，設有毀犯聞我名已，專念受持至心發露，還得清淨乃至菩提。

第六大願，願我來世得菩提時，若諸有情諸根不具，醜陋頑痺聾盲瘡瘻，變背白癩，瘋狂種種病苦之所纏逼，若聞我名至心稱念，皆得端嚴眾病除愈。

第七大願，願我來世得菩提時，若諸有情貧窮困苦無有歸趣，眾病所逼無藥無醫，暫聞我名眾病消散，眷屬增盛資財無乏，身心安樂乃至菩提。

第八大願，願我來世得菩提時，若有女人為女眾苦之所逼切，極生厭離願捨女身，若聞我名至心稱念，即於現身轉成男子，具丈夫相乃至菩提。

第九大願，願我來世得菩提時，令諸有情出魔羅網，復有種種邪見之徒，皆當攝受令生正見，漸令修習諸菩薩行乃至菩提。

第十大願，願我來世得菩提時，若諸有情王法所拘幽禁牢獄枷鎖鞭撻乃至極刑，復有眾多苦楚之事，逼切憂惱無暫樂時，若聞我名以我福德威神力故，皆得解脫一切憂苦乃至菩提。

第十一大願，願我來世得菩提時，若諸有情飢火所惱，為求食故造諸惡業，若聞我名至心稱念，我當先以上妙飲食隨意飽滿，後以法味令住勝樂乃至菩提。

第十二大願，願我來世得菩提時，若諸有情身無衣服，蚊虻寒熱之所逼惱，若聞我名至心稱念，隨其所好即得種種上妙衣服，寶莊嚴

具伎樂香華皆令滿足，離諸苦惱乃至菩提。曼殊室利，是為藥師琉璃光如來應正等覺，行菩薩道時所發十二微妙上願。藥師琉璃光七佛本願功德經卷上。

### 藥師琉璃光七佛本願功德經卷下

大唐三藏法師義淨於佛光內寺譯

爾時佛告曼殊室利，彼藥師琉璃光如來行菩薩道時所發大願，及彼佛土功德莊嚴，我於一劫若過一劫說不能盡，然彼佛土純一清淨，無諸欲染亦無女人，及三惡趣苦惱之聲，以淨琉璃而為其地，城闕宮殿及諸廊宇軒窓羅網皆七寶成，亦如西方極樂世界功德莊嚴，於彼國中有二菩薩，一名日光遍照，二名月光遍照，於彼無量菩薩眾中而為上首，能持彼佛法寶藏，是故曼殊室利，若有淨信男子女人，應當願生彼佛世界。

復次曼殊室利，若有眾生不識善惡惟懷貪惜，不知惠施及施果報，愚癡少智無有信心，多畜珍財勤勞守護，見乞者來心生不喜，設不獲已行惠施時，如割身肉深生悵惜，復有無量慳貪有情積集資財，然於自身尚不能用，況當供給父母妻子奴婢僕使及來乞者，彼諸有情從此命終，生餓鬼中或傍生趣，由昔人間曾聞藥師琉璃光如來名故，雖在惡趣還得憶念彼如來名，即於彼沒生在人中，得宿命智念畏惡趣苦不樂欲樂，好行惠施讚歎施者，所有財物無慳悵心，漸次尚能以

頭目手足血肉身分施來求者。況餘財物<sup>①</sup>

復次曼殊室利。若復有人歸依世尊。受諸學處。而破壞戒威儀及壞正見。諸有持戒正見。不求多聞。於佛所說契經深義不能解了。雖有多聞而懷憍慢。由慢心故自是非他。嫌謗正法為魔伴黨。如是愚人自行邪見。復令無量百千俱胝有情墮大險坑。此諸有情墮於地獄。傍生鬼趣。若曾聞此藥師琉璃光如來名號。由彼如來本願威力。於地獄中憶佛名號。從彼命盡還生人間。正見精進意樂調善。捨俗出家。於佛法中受持學處。無有毀犯。正見多聞解甚深義。離於憍慢不謗正法。不為魔伴。漸次修行諸菩薩行。乃至菩提。

復次曼殊室利。若諸有情慳貪嫉妬造諸惡業。自讚毀他。命終當墮三惡趣中。無量千歲受諸劇苦。從彼終已來生人間。或作牛馬駝驢之屬。恒被鞭撻飢渴纏心。身常負重困苦疲極。若得為人生居下賤奴婢僕使。被他驅役恒不自在。由昔人中曾聞藥師琉璃光如來名號。彼善根力。今復憶念至心歸依。以佛神力眾苦解脫。諸根聰利智慧多聞。恒求勝法。常遇善友。永斷魔羅<sup>②</sup>破無明<sup>③</sup>。竭煩惱河。解脫一切生老病死憂悲苦惱。乃至菩提。

復次曼殊室利。若諸有情好意乖離更相鬪訟。惱亂自他。以身語意造諸惡業。展轉常為不饒益事。互相謀害。告召山林樹塚等神。殺諸眾生。取其血肉。祭祀藥叉羅刹神等。書怨人名。或作形像。以惡呪術而呪詛之。厭魅蟲道。呪起死屍。令斷彼命及壞其身。是諸有情

若得聞此藥師琉璃光如來名號。彼諸惡緣悉不能害。一切展轉皆起慈悲。利益安樂無損惱意及嫌恨心。於自所有常生喜足。

復次曼殊室利。若有四眾。苾芻苾芻尼近事男近事女。及餘淨信男子女人。若能受持八支齋戒。或經一年。或復三月。受持學處。以此善根願生西方極樂世界。見無量壽佛。若聞藥師琉璃光如來名號。臨命終時。有八菩薩乘神通來示其去處。即於彼界種種雜色眾寶花中。自然化生。或有因此生於天上。雖生天中。而昔善根亦不窮盡。不復更生諸餘惡趣。天上壽盡還生人間。或為輪王。統攝四洲。威德自在。勸化無量百千有情。於十善道令其修習。或生剎帝利。婆羅門。居士。貴族。多饒財寶。倉庫盈溢。形相端嚴。眷屬隆盛。聰明智慧。勇健盛猛。有大身力。若是女人。得聞藥師琉璃光如來名號。至心受持。於後不復更受女身。

復次曼殊室利。彼藥師琉璃光如來得菩提時。由本願力。觀諸有情。遇眾病苦。瘦瘡乾消。黃熱等病。或被厭魅蟲道所中。或復短命。或時橫死。欲令是等病苦消除。所求願滿。時彼世尊入三摩地。名曰滅除一切眾生苦惱。既入定。已於肉髻中。出大光明。光中演說大陀羅尼。呪曰。南謨薄伽伐帝。鞞殺社。寶嚩囉。嚩囉帝。三藐三勃陀也。咄姪他。唵。鞞殺逝。鞞殺逝。鞞殺社。三沒揭帝。莎訶。

爾時光中說此呪已。大地震動。放大光明。一切眾生病苦皆除。受安隱樂。曼殊室利。若見

男子女人有病苦者。應當一心為彼病人。清淨澡漱。或食或藥。或無蟲水。呪一百八遍。與彼服食。所有病苦悉皆消滅。若有所求。至心念誦。皆得如意。無病延年。命終之後。生彼世界。得不退轉。乃至菩提。是故曼殊室利。若有男子女人。於彼藥師琉璃光如來。至心懇重恭敬供養者。常持此呪。勿令廢忘。

復次曼殊室利。若有淨信男子女人。得聞如上七佛如來。應正等覺。所有名號。聞已誦持。晨嚼齒木。澡漱清淨。以諸香花。末香。燒香。塗香。作眾伎樂。供養形像。於此經典。若自書。若教人書。一心受持。聽聞其義。於彼法師。應修供養。一切所有資身之具。悉皆施與。勿令乏少。如是便蒙諸佛護念。所求願滿。乃至菩提。

爾時曼殊室利童子。白佛言。世尊。我於末法之時。誓以種種方便。令諸淨信男子女人。得聞七佛如來名號。乃至睡中。亦以佛名。令其覺悟。世尊。若於此經受持。讀誦。或復為他演說。開示。若自書。若教人書。恭敬尊重。以種種華香。塗香。末香。燒香。華鬘。瓔珞。幡蓋。伎樂。而為供養。以五色繒綵。而裹裹之。灑掃淨處。置高座上。是時四大天王。與其眷屬。及與無量百千天眾。皆詣其所。供養守護。世尊。若此經寶流行之處。及受持者。以彼七佛如來本願功德。及聞名號。威神之力。當知是處。無復橫死。亦復不為諸惡鬼神奪其精氣。設已奪者。還得如故。身心安樂。

佛告曼殊室利。如是如是。如汝所說。曼殊室利。若有淨信男子女人。欲供養彼七如來者。

①表(明)表(正藏失未出頭,而為矢應是筆誤)②表(表)同表,書衣③盛(威)威(威)④至(指)指(指)

應先敬造七佛形像。安在清淨上妙之座。散花燒香。以諸幢幡莊嚴其處。七日七夜。受八戒齋。食清淨食。澡浴身體。著新淨衣。心無垢濁。亦無恚害。於諸有情。常起利樂。慈悲喜捨。平等之心。鼓樂絃歌。稱讚功德。右繞佛像。念彼如來。所有本願。讀誦此經。思惟其義。演說開示。隨其所願。求長壽得長壽。求富饒得富饒。求官位得官位。求男女得男女。一切皆遂。若復有人。忽得惡夢。見諸惡相。或怪鳥來集。或於其家。百怪出現。此人若以上妙資具。恭敬供養。彼諸佛者。惡夢惡相。諸不吉祥。悉皆隱沒。不能為患。或有水火刀毒。懸崖險道。惡象師子。虎狼熊羆。蛇蠍蜈蚣。如是等怖。若能至心憶念。彼佛恭敬供養。一切怖畏。皆得解脫。若他國侵擾盜賊。反亂。憶念恭敬。彼如來者。所有怨敵。悉皆退散。復次。曼殊室利。若有淨信男子。女人等。乃至盡形。不事餘天。惟當一心歸佛法。僧受持禁戒。若五戒。十戒。菩薩二十四戒。苾芻二百五十戒。苾芻尼五百戒。於諸戒中。或有毀犯。怖墮惡趣。若能專念。彼佛名號。恭敬供養者。必定不生三惡趣中。或有女人。臨當產時。受於極苦。若能至心稱名。禮讚恭敬。供養七佛。如來。眾苦皆除。所生子。顏貌端正。見者歡喜。利根聰明。少病安樂。無有非人奪其精氣。

皆無虛妄。世尊。此日月輪。可令墮落。妙高山王。可使傾動。諸佛所言。終無有異。世尊。然有眾生。信根不具。聞說諸佛。甚深境界。作是思惟。云何但念七佛名號。便獲爾所功德。勝利。由此不信。便生誹謗。彼於長夜。失大利樂。墮諸惡趣。佛告阿難。彼諸有情。若得耳聞諸佛名號。墮惡趣者。無有是處。唯除定業不可轉者。阿難。此是諸佛甚深境界。難可信解。汝能信受。當知皆是如來威力。阿難。一切聲聞及獨覺等。皆不能知。唯除一生補處菩薩。阿難。人身難得。於三寶中。信敬尊重。亦難可得。得聞七佛如來名號。復難於是。阿難。彼諸如來。無量菩薩。行無量巧方便。無量廣大願。如是行願。善巧方便。我若一劫。若過一劫。說不能盡。爾時眾中。有一菩薩。摩訶薩。名曰救脫。即從座起。偏袒右肩。右膝著地。合掌向佛。白言。世尊。於後末世。像法起時。若有眾生。為諸病苦之所逼惱。身形羸瘦。不能飲食。喉唇乾燥。目視皆暗。死相現前。父母親屬。朋友知識。啼泣圍繞。身臥本處。見彼琰魔法王之使。引其神識。將至王所。然諸有情。有俱生神。隨其所作。善惡之業。悉皆記錄。授與彼王。王即依法。問其所作。隨彼罪福。而處斷之。是時病人。親屬知識。若能為彼。歸依諸佛。種種莊嚴。如法供養。而彼神識。或經七日。或二七日。乃至七七。日。如從夢覺。復本精神。皆自憶知。善不善業。所得果報。由自證見。業報不虛。乃至命難。亦不造惡。是故淨信男子。女人。皆應受持七佛名號。隨力所能。恭敬供養。

爾時具壽阿難。問救脫菩薩曰。善男子。恭敬供養。彼七如來。其法云何。救脫菩薩言。大德。若有病人。及餘災厄。欲令脫者。當為其人。七七夜。持八戒齋。應以飲食及餘資具。隨其所有。供佛及僧。晝夜六時。恭敬禮拜。七佛如來。讀誦此經。四十九遍。然四十九燈。造彼如來形像。七軀。一一像前。各置七燈。其七燈狀。圓若車輪。乃至四十九夜。光明不絕。造雜綵幡。四十九首。并一長幡。四十九尺。放四十九生。如是。即能離災厄難。不為諸橫惡鬼所持。大德。阿難。是為供養如來法式。若有於此。七佛之中。隨其一佛。稱名供養者。皆得如是。無量功德。所求願滿。何況盡能具足供養。復次。大德。阿難。若刹帝利。灌頂王等。災難起時。所謂人眾。疾疫難。他國侵逼難。自界叛逆難。星宿變怪難。日月薄蝕難。非時風雨難。過時不雨難。彼刹帝利。灌頂王等。爾時當於一切有情。起慈悲心。放大恩赦。脫諸幽厄。苦惱眾生。如前法式。供養諸佛。由此善根。及彼如來。本願力故。令其國界。即得安隱。風雨順時。穀稼成熟。國內眾生。無病安樂。又無暴惡藥叉等神。共相惱亂。一切惡相。悉皆隱沒。而刹帝利。灌頂王等。皆得增益。壽命色力。無病自在。大德。阿難。若帝后妃。主儲君。王子大臣。輔相。宮中。嫗女。百官。黎庶。為病所苦。及餘厄難。亦應敬造七佛形像。讀誦此經。然燈造幡。放諸生命。至誠供養。燒香散花。即得病苦。銷除。解脫眾難。爾時具壽阿難。問救脫菩薩言。善男子。云何已盡之命。而可增益。救脫菩薩言。大德。仁豈

不聞如來說有九橫死耶。由是世尊為說呪藥隨事救療。然燈造幡修諸福業。以修福故得延壽命。阿難問言。九橫云何。救脫菩薩言。一者若諸有情得病雖輕。然無醫藥及看病者。設復遇醫不授其藥。實不應死而使橫死。又信世間邪魔外道妖變之師。妄說禍福。便生恐動心不自正。卜問吉凶殺諸眾生求神解奏。呼召魍魎請福祈恩。欲冀延年終不能得。愚迷倒見遂令橫死。入於地獄無有出期。二者橫為王法之所誅戮。三者敗獵嬉戲耽淫嗜酒放逸無度。橫為非人奪其精氣。四者橫為火焚。五者橫為水溺。六者橫為種種惡獸所噉。七者橫墮山崖。八者橫為毒藥厭禱呪詛起屍鬼等之所中害。九者飢渴所困不得飲食而使橫死。是為如來說略說橫死有此九種。其餘復有無量諸橫難可具說。

復次阿難。彼琰魔王簿錄世間所有名籍。若諸有情不孝五逆。毀辱三寶。壞君臣法。破於禁戒。琰魔法王隨罪輕重考而罰之。是故我今勸諸有情。然燈造幡放生修福。令度苦厄。不遭眾難。爾時眾中有十二藥叉大將。俱在會坐其名曰。

宮毘羅大將 跋折羅大將 迷企羅大將  
頰儼羅大將 末儼羅大將 娑儼羅大將  
因陀羅大將 波夷羅大將 薄呼羅大將  
真達羅大將 朱杜羅大將 毘羯羅大將  
此十二藥叉大將。一一各有七千藥叉。以為眷屬。同時舉聲白佛言。世尊。我等今者蒙佛威力。得聞七佛如來名號。於諸惡趣無復怖

畏。我等相率皆同一心。乃至盡形歸佛法僧。誓當荷負一切有情。為作義利饒益安樂。隨於何處城邑聚落空閑林中。若有此經流布。讀誦。或復受持七佛名號恭敬供養者。我等眷屬衛護是人。令脫眾難。所有願求悉令滿足。或有疾厄求度脫者。亦應讀誦此經。以五色縷結我名字。得如願已。然後解結。爾時世尊讚諸藥叉大將言。善哉善哉。大藥叉將。汝等念報七佛如來恩德者。常應如是利益安樂一切有情。

爾時會中有多天眾。智慧妙少。作如是念。云何過是。旃伽河沙諸佛世界。現在如來暫聞名者。便獲無邊殊勝功德。爾時釋迦牟尼如來知諸天眾心之所念。即入警召一切如來。甚深妙定。纔入定已。一切三千大千世界六種震動。雨天妙花及天香末。彼七如來見是相已。各從其國來至索訶世界。與釋迦如來共相問訊。時佛世尊由其先世本願力故。各自於天寶莊嚴師子座上。隨處安坐。諸菩薩眾天龍八部人非人等。國王王子中宮妃主。并諸大臣婆羅門長者居士。前後圍遶。而為說法。時諸天眾見彼如來。皆已雲集。生大希有疑惑。便除時諸大眾。歎未曾有。同聲讚言。善哉善哉。釋迦如來。饒益我等。為除疑念。令彼如來。皆至於此。時諸大眾。各隨自力。以妙香華及眾瓔珞。諸天伎樂。供養如來。右遶七匝。合掌禮敬。讚言。希有希有。諸佛如來。甚深境界。不可思議。由先願力。善巧方便。共現如是奇異之相。爾時大眾。各各發願。願諸眾

生皆得如是如來勝定。爾時曼殊室利。即從座起。合掌恭敬。遶佛七匝。禮雙足。已白言。世尊。善哉善哉。如來定力不可思議。由本願力。方便善巧。成就眾生。惟願為說。大力神呪。能令來世。薄福眾生。煩惱所纏。日月星辰。所有厄難。疫病怨惡。及行險道。遭諸恐怖。為作歸依。令得安隱。彼諸眾生。於此神呪。若自書教人書。受持讀誦。廣為他說。常蒙諸佛之所護念。佛自現身。令願滿足。不墮惡趣。亦無橫死。時諸如來。讚曼殊室利言。善哉善哉。此是我等威神之力。令汝勸請。哀愍眾生。離諸苦難。為說神呪。汝應諦聽。善思念之。我當為說。曼殊室利。有大神呪。名曰如來定力。琉璃光。若有男子女人。書寫讀誦。恭敬供養。於諸含識。起大悲心。所有願求。皆得滿足。諸佛現身。而為護念。離眾障惱。當生佛國。時七如來。以一音聲。即說呪曰。

但姪他 具謎具謎 警尼謎膩 吧上 末底末底  
馱頰怛他 揭多三摩地 頰提瑟恥帝 頰帝末  
帝波例 波跛輪但儼 薩婆波跛那世也 敦  
睇勃圖 唱答謎隴 謎矩謎 佛鐸器怛羅 鉢  
里輸但儼 曇謎呢曇謎 謎嚕謎嚕 謎嚕尸揭  
囉薩婆哥羅 蜜栗覩 尼婆囉 勃提蘇勃  
睇 佛陀陀頰提瑟 佉泥娜 曷略又覩 謎薩  
婆提婆 二謎頰 三謎 三曼揆 和漢囉 覩謎薩  
婆 佛陀菩提薩埵 苦謎苦謎 鉢喇苦謎 曼  
覩謎 薩婆伊底隴 波達婆薩婆 毘何大也 薩  
婆薩埵難者 瞞泥瞞泥 瞞泥 瞞也 謎薩  
婆阿舍 薛琉璃也 鉢喇底婆細 薩婆波跛

①苦(苦) ②籍(籍) ③警(警) ④隴(隴) ⑤隴(隴) ⑥水中山也

著楊羯囉莎訶

爾時七佛說此呪時，光明普照大地，震動種種神變，一時俱現。時諸大眾見此事已，各各隨力以天香花塗香末香奉上彼佛，咸唱善哉。右遶七匝，彼佛世尊同聲唱言：汝等一切人天大眾，應如是知。若有善男子善女人，若王王子妃后大臣寮庶之類，若於此呪受持讀誦聽聞演說，以妙香花供養經卷，著新淨衣在清淨處持八戒齋，於諸含識常生慈愍，如是供養得無量福。若復有人有所祈願，應當造此七佛形像，可於靜處以諸香華懸繒幡蓋，上妙飲食及諸伎樂而為供養，并復供養菩薩諸天。在佛像前端坐誦呪，於七日中持八戒齋，誦滿一千八遍，彼諸如來及諸菩薩悉皆護念，執金剛菩薩并諸釋梵四天王等亦來擁衛。此人所有五無間罪一切業障悉皆消滅，無病延年亦無橫死及諸疾疫。他方賊盜欲來侵境，鬪諍戰陣言訟讐隙，飢餓旱澇，如是等怖一切皆除，共起慈心猶如父母，有所願求無不遂意。

自立要誓，若有淨信男子女人憶念我者，應誦此呪即說呪曰：但姪他，惡婁莫婁，咀羅婁，麼麼婁具囉，訶呼去，醯去，末囉末囉末囉，緊樹囉布囉莎訶。

若有淨信男子女人國王王子大臣輔相中宮嫖女，誦七佛名及此神呪，讀誦書寫恭敬供養，現世皆得無病長壽，離眾苦惱不墮三途，得不退轉，乃至菩提。彼諸佛土隨意受生，常見諸佛得宿命智，念定總持無不具足。若患鬼瘡等病，當書此呪繫之肘後，病若差已，置清淨處。爾時執金剛菩薩詣七佛所，右遶三匝各申禮敬，白言世尊，惟願慈悲護念於我。我今為欲饒益未來男子女人持是經者，我更為說陀羅尼呪。時彼七佛讚執金剛言：善哉善哉，執金剛，我加護汝，可說神呪，為護未來持經之人，令無眾惱所求滿足。時執金剛菩薩即說呪曰：

南麼馱多喃，三藐三佛陀喃，南麼薩婆跋折囉達囉喃，咄姪他，唵跋折囉，跋折囉，莫訶跋折囉，跋折囉波捨，陀囉爾三麼三麼三曼頹，阿鉢囉底嘍多，跋折囉，苦麼苦麼鉢囉苦曼觀謎，薩婆毘阿大也，矩嚕矩嚕薩婆羯麼，阿伐囉拏爾叉也，三麼也未奴三末囉薄伽畔跋折囉波爾薩婆舍謎鉢哩，脯囉也莎訶。

世尊，若復有人持七佛名，憶念彼佛本願功德，并持此呪讀誦演說，我令彼人所願滿足，無所乏少。若欲見我問善惡者，應當書寫此經造七佛像，并執金剛菩薩像，皆於像身安

佛舍利，於此像前如上所說種種供養禮拜，旋繞於眾生處起慈悲心，受八戒齋，日別三時澡浴清淨，三時衣別，從白月八日至十五日，每日誦呪一百八遍，心無散亂。我於夢中即自現身共為言說，隨所求者皆令滿足。時大會中有諸菩薩皆悉唱言：善哉善哉，執金剛陀羅尼不可思議，實為善說。時七如來作如是語：我等護汝所說神呪，為欲饒益一切眾生，皆得安樂所求願滿，不令此呪隱沒於世。爾時七佛告諸菩薩釋梵四天王曰：我今以此神呪付屬汝等，并此經卷，於未來世後五百歲法欲滅時，汝等皆應護持是經，此經威力利益甚多，能除眾罪，善願皆遂，勿於薄福眾生誹謗正法毀賢聖者。授與斯經，令法速滅。爾時東方七佛世尊見此大眾所作已辦，機緣滿足，無復疑心，各還本土於其座上忽然不現。

爾時具壽阿難陀，即從座起禮佛雙足，右膝著地合掌恭敬，而白佛言：世尊，當何名此經？我等云何受持？佛告阿難陀：此經名為七佛如來應正等覺本願功德殊勝莊嚴，亦名曼殊室利所問，亦名藥師瑠璃光如來本願功德，亦名執金剛菩薩發願要期，亦名淨除一切業障，亦名所有願求皆得圓滿，亦名十二大將發願護持。如是名字汝當奉持。時薄伽梵說是經已，諸大菩薩及聲聞眾，天龍藥叉健闍婆阿蘇羅揭路荼緊那羅莫呼洛伽人非人等，一切大眾聞佛所說，皆大歡喜信受奉行。藥師瑠璃光七佛本願經卷下。

佛說觀彌勒菩薩上生兜率天經 No. 452

宋居士沮渠京聲譯

如是我聞。一時佛在舍衛國祇樹給孤獨園。爾時世尊於初夜分舉身放光。其光金色。遶祇陀園周遍七匝。照須達舍亦作金色。有金色光猶如段雲。遍舍衛國處處皆雨金色蓮花。其光明中有無量百千諸大化佛。皆唱是言。今於此中有千菩薩。最初成佛名拘留孫。最後成佛名曰樓至。說是語已。尊者阿若憍陳如。即從禪起。與其眷屬二百五十人俱。尊者摩訶迦葉。與其眷屬二百五十人俱。尊者大目犍連。與其眷屬二百五十人俱。尊者舍利弗。與其眷屬二百五十人俱。摩訶波闍波提比丘尼。與其眷屬千比丘尼俱。須達長者。與三千優婆塞俱。毘舍佉母。與二千優婆夷俱。復有菩薩摩訶薩名跋陀婆羅。與其眷屬十六菩薩俱。文殊師利法王子。與其眷屬五百菩薩俱。天龍夜叉乾闥婆等一切大眾。覩佛光明。皆悉雲集。爾時世尊出廣長舌相。放千光明。一一光明各有千色。一色中有無量化佛。是諸化佛異口同音。皆說清淨諸大菩薩甚深不可思議諸陀羅尼法。所謂阿難陀目陀羅尼。空慧陀羅尼。無礙性陀羅尼。大解脫無相陀羅尼。爾時世尊以一音聲說百億陀羅尼門。說此陀羅尼已。爾時會中有一菩薩名曰彌勒。聞佛所說。應時即得百萬億陀羅尼門。即從座起。整衣服。叉手合掌。住立佛前。爾時優波離亦從座起。頭面作禮。而白佛言。

世尊。世尊往昔於毘尼中。及諸經藏說阿逸多。次當作佛。此阿逸多。具凡夫身。未斷諸漏。此人命終。當生何處。其人今者。雖復出家。不修禪定。不斷煩惱。佛記此人。成佛無疑。此人命終。生何國土。佛告優波離。諦聽。諦聽。善思念之。如來應正遍知。今於此眾說彌勒菩薩摩訶薩。阿耨多羅三藐三菩提記。此人從今十二年後。命終。必得往生兜率陀天。上。爾時兜率陀天。上有五百萬億天子。一一天子。皆修甚深檀波羅蜜。為供養一生補處菩薩故。以天福力。造作宮殿。各各脫身。栴檀摩尼寶冠。長跪合掌。發是願言。我今持此無價寶珠。及以天冠。為供養大心眾生故。此人來世不久。當成阿耨多羅三藐三菩提。我於彼佛莊嚴國界。得受記者。令我寶冠。化成供具。如是諸天子等。各各長跪。發弘誓願。亦復如是。時諸天子。作是願已。是諸寶冠。化作五百萬億寶宮。一一寶宮。有七重垣。一一垣。七寶所成。一一寶出五百億光明。一一光明。中有五百億蓮華。一一蓮華。化作五百億七寶行樹。一一樹。葉有五百億寶色。一一寶色。有五百億閻浮檀金光。一一閻浮檀金光。中出五百億諸天寶女。一一寶女。住立樹下。執百億寶。無數瓔珞。出妙音樂。時樂音中。演說不退轉地法輪之行。其樹生果。如頗黎色。一切眾色。入頗梨色中。是諸光明。右旋婉轉。流出眾音。眾音演說大慈大悲法。一一垣。牆高六十二由旬。厚十四由旬。五百億龍王。圍繞此垣。一一龍王。雨五百億七寶行樹。莊嚴垣上。自然有風吹動。此

樹。樹相振觸。演說苦空無常無我。諸波羅蜜。爾時此宮。有一大神名。牢度跋提。即從座起。遍禮十方佛。發弘誓願。若我福德。應為彌勒菩薩。造善法堂。令我額上。自然出珠。既發願已。額上。自然出五百億寶珠。瑠璃玻梨。一切眾色。無不具足。如紫紺摩尼。表裏映徹。此摩尼光。迴旋空中。化為四十九重微妙寶宮。一一欄楯。萬億梵摩尼寶所共合成。諸欄楯間。自然化生九億天子。五百億天女。一一天子。手中化生無量億萬七寶蓮華。一一蓮華。上有無量億光。其光明中。具諸樂器。如是天樂。不鼓自鳴。此聲出時。諸女。自然執眾樂器。競起歌舞。所詠歌音。演說十善。四弘誓願。諸天聞者。皆發無上道心。時諸園中。有八色瑠璃渠。一一渠。有五百億寶珠。而用合成。一一渠中。有八味水。八色具足。其水上。湧游梁棟。間於四門外。化生四花。水出華中。如寶花流。一一華上。有二十四天女。身色微妙。如諸菩薩。莊嚴身相。手中。自然化五百億寶器。一一器中。天諸甘露。自然盈滿。左肩。荷佩無量瓔珞。右肩。復負無量樂器。如雲住空。從水而出。讚歎菩薩六波羅蜜。若有往生兜率天上。自然得此天女侍御。亦有七寶大師子座。高四由旬。閻浮檀金。無量眾寶。以為莊嚴。座四角。頭生四蓮華。一一蓮華。百寶所成。一一寶出百億光明。其光微妙。化為五百億眾寶。雜花莊嚴寶帳。時十方。面百千梵王。各各持一梵天妙寶。以為寶鈴。懸寶帳上。時小梵王。持天眾寶。以為羅網。彌覆帳上。爾時百千無數天子。天女眷

①佛 ②佛 ③佛 ④佛 ⑤佛 ⑥佛 ⑦佛 ⑧佛 ⑨佛 ⑩佛 ⑪佛 ⑫佛 ⑬佛 ⑭佛 ⑮佛 ⑯佛 ⑰佛 ⑱佛 ⑲佛 ⑳佛 ㉑佛 ㉒佛 ㉓佛 ㉔佛 ㉕佛 ㉖佛 ㉗佛 ㉘佛 ㉙佛 ㉚佛 ㉛佛 ㉜佛 ㉝佛 ㉞佛 ㉟佛 ㊱佛 ㊲佛 ㊳佛 ㊴佛 ㊵佛 ㊶佛 ㊷佛 ㊸佛 ㊹佛 ㊺佛 ㊻佛 ㊼佛 ㊽佛 ㊾佛 ㊿佛

屬各持寶華以布座上。是諸蓮花自然皆出五百億寶女。手執白拂侍立帳內。持宮四角。以為絞絡。時諸閣間有百千天女。色妙無比。手執樂器。其樂音中演說苦空無常無我諸波羅蜜。如是天宮有百億萬無量寶色。一一諸女亦同寶色。爾時十方無量諸天命終。皆願往生兜率天宮。時兜率天宮有五大神。

第一大神名曰寶幢。身雨七寶散宮牆內。一寶珠化成無量樂器。懸處空中不鼓自鳴。有無量音適眾生意。第二大神名曰花德。身雨眾花彌覆宮牆化成花蓋。一一花蓋百千幢幡以為導引。第三大神名曰香音。身毛孔中雨出微妙海此岸旃檀香。其香如雲作百寶色。遶宮七匝。第四大神名曰喜樂。雨如意珠。一一寶珠自然住在幢幡之上。顯說無量歸佛歸法歸比丘僧。及說五戒無量善法諸波羅蜜。饒益勸助菩提意者。第五大神名曰正音聲。身諸毛孔流出眾水。一一水上有五百億花。一一華上有二十五玉女。一一玉女身諸毛孔出一切音聲。勝天魔后所有音樂。佛告優波離。此名兜率陀天十善報應勝妙福處。若我住世一小劫中。廣說一生補處菩薩報應及十善果者。不能窮盡。今為汝等畧而解說。佛告優波離。若有比丘及一切大眾。不厭生死樂生天者。愛敬無上菩提心者。欲為彌勒作弟子者。當作是觀。作是觀者。應持五戒八齋具足戒。身心精進不求斷結。修十善法。一一思惟兜率陀天上上妙快樂。作是

觀者名為正觀。若他觀者名為邪觀。

爾時優波離即從座起。整衣服頭面作禮。白佛言。世尊。兜率陀天上乃有如是極妙樂事。今此大士何時於閻浮提沒生於彼天。佛告優波離。彌勒先於波羅捺國劫波利村波婆利大婆羅門家生。却後十二年二月十五日。還本生處結加趺坐。如入滅定。身紫金色。光明豔赫如百千日。上至兜率陀天。其身舍利如鑄金像。不動不搖。身圓光中有首楞嚴三昧。般若波羅蜜字義炳然。時諸人天尋即為起眾寶妙塔供養舍利。時兜率陀天七寶臺內摩尼殿上師子床座忽然化生。於蓮華上結加趺坐。身如閻浮檀金色。長十六由旬。三十二相八十種好。皆悉具足。頂上肉髻髮紺瑠璃色。釋迦毘楞伽摩尼。百千萬億甄叔迦寶。以嚴天冠。其天寶冠有百萬億色。一一色中有無量百千化佛。諸化菩薩以為侍者。復有他方諸大菩薩作十八變。隨意自在。住天冠中。彌勒眉間有白毫相光。流出眾光作百寶色。三十二相。一一相中有五百億寶色。一一好亦有五百億寶色。一一相好。顯出八萬四千光明雲。與諸天子各坐花座。晝夜六時常說不退轉地法輪之行。經一時中成就五百億天子。令不退轉於阿耨多羅三藐三菩提。如是處兜率陀天。晝夜恒說此法度諸天子。閻浮提歲數五十六億萬歲。爾乃下生於閻浮提。如彌勒下生經說。佛告優波離。是名彌勒菩薩於閻浮提沒生兜率陀天。因緣。佛滅度後。我諸弟子若有精勤修諸功德威儀

不缺。掃塔塗地。以眾名香妙花供養。行眾三昧。深入正受。讀誦經典。如是等人。應當至心。雖不斷結。如得六通。應當繫念。念佛形像。稱彌勒名。如是等輩。若一念頃。受八戒齋。修諸淨業。發弘誓願。命終之後。譬如壯士屈申臂頃。即得往生兜率陀天。於蓮華上結加趺坐。百千天子作天伎樂。持天曼陀羅花。摩訶曼陀羅華。以散其上。讚言善哉善哉。善男子。汝於閻浮提廣修福業。來生此處。此處名兜率陀天。今此天主名曰彌勒。汝當歸依。應聲即禮。禮已。諦觀眉間白毫相光。即得超越九十億劫生死之罪。是時菩薩隨其宿緣。為說妙法。令其堅固不退轉於無上道心。如是等眾生。若淨諸業行六事法。必定無疑。當得生於兜率天上。值遇彌勒。亦隨彌勒下閻浮提。第一聞法。於未來世。值遇賢劫一切諸佛。於星宿劫。亦得值遇諸佛世尊。於諸佛前受菩提記。佛告優波離。佛滅度後。比丘比丘尼優婆塞。優婆夷。天龍夜叉乾闥婆阿脩羅樓羅緊那羅摩睺羅伽等。是諸大眾。若有得聞彌勒菩薩摩訶薩名者。聞已歡喜恭敬禮拜。此人命終如彈指頃。即得往生。如前無異。但得聞是彌勒名者。命終亦不墮黑闇處。邊地邪見諸惡律儀。恒生正見眷屬。成就不謗三寶。佛告優波離。若善男子善女人。犯諸禁戒。造眾惡業。聞是菩薩大悲名字。五體投地。誠心懺悔。是諸惡業。速得清淨。未來世中。諸眾生等。聞是菩薩大悲名稱。造立形像。香花衣服。繒蓋幢幡。禮拜繫念。此人命欲終時。彌勒菩

薩放眉間白毫大人相光，與諸天子雨曼陀羅花來迎此人。此人須臾即得往生，值遇彌勒，頭面禮敬，未舉頭頃，便得聞法。即於無上道得不退轉。於未來世，得值恒河沙等諸佛如來，佛告優波離：汝今諦聽，是彌勒菩薩於未來世當為眾生作大歸依處。若有歸依彌勒菩薩者，當知是人於無上道得不退轉。彌勒菩薩成多陀阿伽度阿羅訶三藐三佛陀時，如此行人見佛光明，即得授記。佛告優波離：佛滅度後，四部弟子天龍鬼神，若有欲生兜率陀天者，當作是觀，繫念思惟，念兜率陀天持佛禁戒，一日至七日，思念十善行十善道，以此功德迴向願生彌勒前者，當作是觀。作是觀者，若見一天人見一蓮花，若一念頃稱彌勒名，此人除却千二百劫生死之罪。但聞彌勒名合掌恭敬，此人除却五十劫生死之罪。若有敬禮彌勒者，除却百億劫生死之罪。設不生天，未來世中龍花菩提樹下亦得值遇發無上心。

說是語時，無量大眾即從坐起，頂禮佛足，禮彌勒足，遶佛及彌勒菩薩百千匝，未得道者各發誓願：我等天人八部，今於佛前發誠實誓，願於未來世值遇彌勒，捨此身已，皆得上生兜率陀天。世尊記曰：汝等及未來世修福持戒，皆當往生彌勒菩薩前，為彌勒菩薩之所攝受。佛告優波離：作是觀者名為正觀，若他觀者名為邪觀。

爾時尊者阿難即從座起，叉手長跪白佛言：世尊，善哉世尊，快說彌勒所有功德，亦記未

來世修福眾生所得果報。我今隨喜。唯然世尊。此法之要云何受持？當何名此經？佛告阿難：汝持佛語，慎勿忘失。為未來世開生天路。示菩提相，莫斷佛種。此經名彌勒菩薩般涅槃，亦名觀彌勒菩薩生兜率陀天勸發菩提心。如是受持，佛說是語時，他方來會十萬菩薩，得首楞嚴三昧。八萬億諸天發菩提心，皆願隨從彌勒下生。佛說是語時，四部弟子天龍八部，聞佛所說，皆大歡喜，禮佛而退。

佛說觀彌勒菩薩上生兜率天經

佛說彌勒下生經

No. 453 [Nos. 454, 455]

西晉月氏三藏竺法護譯

聞如是。一時佛在舍衛國祇樹給孤獨園，與大比丘眾五百人俱。爾時阿難偏露右肩，右膝著地，白佛言：如來玄鑒無事不察，當來過去現在三世皆悉明了。過去諸佛姓名號，弟子菩薩翼從多少，皆悉知之。一劫百劫若無數劫，皆悉觀察。亦復如是。國王大臣人民，姓字則能分別。如今現在國界若干，亦復明了。將來久遠彌勒出現，至真等正覺，欲聞其變。弟子翼從，佛境豐樂，為經幾時？佛告阿難：汝還就坐聽我所說。彌勒出現，國土豐樂，弟子多少，善思念之。執在心懷，是時阿難從佛受教，即還就坐。爾時世尊告阿難曰：將來久遠於此國界，當有城郭名曰翅頭，東西十二由旬，南北七由旬，土地豐熟，人民熾盛，街巷成行。爾時城中有龍王名曰水光，夜雨香澤

晝則清和，是時翅頭城中有羅刹鬼名曰葉華，所行順法不違正教，每向人民寢寐之後，除去穢惡，諸不淨者，常以香汁而灑其地，極為香淨。阿難當知，爾時閻浮地東南西北千萬由旬，諸山河石壁皆自消滅，四大海水各減一萬。時閻浮地極為平整，如鏡清明，舉閻浮地內穀食豐賤，人民熾盛，多諸珍寶，諸村落相近，鷄鳴相接。是時弊華果樹枯竭，穢惡亦自消滅，其餘甘美果樹香氣，殊好者皆生于地。爾時時氣和適，四時順節，人身之中無有百八之患，貪欲瞋恚愚癡不大慙懃，人心均平，皆同一意，相見歡悅，善言相向，言辭一類，無有差別。如彼優單越人而無有異，是時閻浮地內人民大小皆同一向，無若干之差別也。彼時男女之類，意欲大小便時，地自然開，事訖之後，地便還合。爾時閻浮地內自然生粳米，亦無皮裹，極為香美，食無患苦。所謂金銀珍寶車渠馬瑙真珠琥珀，各散在地，無人省錄。是時人民手執此寶，自相謂言：昔者之人由此寶故，更相傷害，繫閉在獄，受無數苦惱。如今此寶與瓦石同流，無人守護，爾時法王出現，名曰曠法，正法治化，七寶成就，所謂七寶者：輪寶、象寶、馬寶、珠寶、玉女寶、典兵寶、守藏之寶。是謂七寶。鎮此閻浮地內，不以刀杖自然摩伏。如今阿難，四珍之藏，乾陀越國、伊羅鉢寶藏，多諸珍琦異物，不可稱計。第二彌梯羅國，網羅大藏，亦多珍寶。第三須賴吒大國，有大寶藏，亦多珍寶。第四波羅捺國，有大寶藏，多諸珍寶，不可稱計。此四大藏



自然應現，諸守藏人各來白王，唯願大王以此寶藏之物惠施貧窮。爾時蟻佉大王得此寶已，亦復不省錄之，意無財寶之想。時閻浮地內，自然樹上生衣極細柔軟，人取著之，如今優單越人，自然樹上生衣而無有異。爾時彼王有大臣名曰修梵摩，是王少小同好，王甚愛敬，又且顏貌端正，不長不短，不肥不瘦，不白不黑，不老不少。是時修梵摩有妻名梵摩越，王女中最極為殊妙，如天帝妃，口作優鉢蓮華香，身作栴檀香，諸婦人八十四態，永無復有，亦無疾病亂想之念。爾時彌勒菩薩於兜率天，觀察父母不老不少，便降神下，應從右脇生。如我今日右脇生，無異。彌勒菩薩亦復如是。兜率諸天各各唱令，彌勒菩薩已降神生。是時修梵摩即與子立字名曰彌勒。彌勒菩薩有三十二相八十種好莊嚴其身，身黃金色。爾時人壽極長，無有諸患，皆壽八萬四千歲。女人年五百歲，然後出嫡。爾時彌勒在家，未經幾時，便當出家學道。爾時去翅頭城不遠，有道樹名曰龍花，高一由旬，廣五百步。時彌勒菩薩坐彼樹下，成無上道果。當其夜半，彌勒出家，即於其夜成無上道。時三千大千刹土六返震動，地神各各相告曰：今時彌勒已成佛，轉至閻四天王宮。彌勒已成佛道，轉轉聞徹三十三天。豔天兜率天，化自在天，他化自在天，聲聞展轉至梵天。彌勒已成佛道，爾時魔王名大將，以法治化，聞如來名音響之聲，歡喜踊躍，不能自勝。七日七夜不眠不寐，是時魔王將欲界無數天人，至彌

勒佛所恭敬禮拜。彌勒聖尊與諸天人漸漸說法微妙之論，所謂論者，施論戒論生天之論，欲不淨想，出要為妙。爾時彌勒見諸人民，已發心歡喜，諸佛世尊常所說法，苦習盡道，盡與諸天人廣分別其義。爾時座上八萬四千天子，諸塵垢盡得法眼淨。爾時大將魔王告彼界人民之類曰：汝等速出家，所以然者，彌勒今日已度彼岸，亦當度汝等使至彼岸。爾時翅頭城中有長者名曰善財，聞魔王教，令又聞佛音響，將八萬四千眾至彌勒佛所，頭面禮足，在一面坐。爾時彌勒漸與說法微妙之論，所謂論者，施論戒論生天之論，欲不淨想，出要為妙。爾時彌勒見諸人民，心開意解，如諸佛世尊常所說法，苦習盡道，與諸人民廣分別義。爾時座上八萬四千諸塵垢盡得法眼淨。是時善財與八萬四千人等，即前白佛求索出家。善修梵行，盡成阿羅漢道。爾時彌勒初會八萬四千人得阿羅漢。是時蟻佉王聞彌勒已成佛道，便往至佛所，欲得聞法。時彌勒佛與王說法，初善中善，竟善義理深邃。爾時大王復於異時，立太子為王，賜剃頭師珍寶，復以雜寶與諸梵志，將八萬四千眾往至佛所，求作沙門。盡成道果，得阿羅漢。是時修梵摩大長者，聞彌勒已成佛道，將八萬四千梵志之眾，往至佛所，求作沙門，得阿羅漢。唯修梵摩一人，斷三結，使必盡苦際。是時佛母梵摩越，復將八萬四千婁女之眾，往至佛所，求作沙門。爾時諸女人盡得阿羅漢。唯有梵摩越一人

斷三結，使成須陀洹。爾時諸刹利婦，聞彌勒如來出現世間，成正覺，數千萬眾往至佛所，頭面禮足，在一面坐，各各生心，求作沙門。出家學道，或有越次取證，或有不取證者。爾時阿難，其不越次取證者，盡是奉法之人。患厭一切世間修，不可樂想。爾時彌勒當說三乘之教，如我今日弟子之中，大迦葉者，行十二頭陀，過去諸佛所善修梵行。此人當佐彌勒勸化人民。

爾時迦葉去如來不遠，結加趺坐，正身正意，繫念在前。爾時世尊告迦葉曰：吾今年已衰，耗向八十餘。然今如來有四大聲聞，堪任遊化智慧，無盡眾德具足。云何為四？所謂大迦葉比丘、屠鉢、歎比丘、賓頭盧比丘、羅云比丘。汝等四大聲聞，要不般涅槃，須吾法沒盡。然後乃當般涅槃。大迦葉亦不應般涅槃，要須彌勒出現世間。所以然者，彌勒所化弟子，盡是釋迦文弟子。由我遺化，得盡有漏。摩竭國界毘提村中，大迦葉於彼山中住。又彌勒如來將無數千人眾，前後圍遶，往至此山中。遂蒙佛恩，諸鬼神當與開門，使得見迦葉禪窟。是時彌勒申右手，指示迦葉，告諸人民：過去久遠，釋迦文佛弟子名曰迦葉，今日現在頭陀苦行，最為第一。是時諸人見是事，已歎未曾有。無數百千眾，生諸塵垢，盡得法眼淨。或復有眾生見迦葉身，已此名為最初之會。九十六億人，皆得阿羅漢。斯等之人，皆是我弟子。所以然者，悉由受我訓之所致也。亦由四事因緣，惠施仁愛利人等利。爾時阿難、彌勒

如來當取迦葉僧伽梨著之。是時迦葉身體奄然星散。是時彌勒復取種種華香供養迦葉。所以然者。諸佛世尊有敬心於正法故。彌勒亦由我所受正法化。得成無上正真之道。阿難當知。彌勒佛第二會時。有九十四億人。皆是阿羅漢。亦復是我遺教弟子。行四事供養之所致也。又彌勒第三之會。九十二億人。皆是阿羅漢。亦復是我遺教弟子。爾時比丘姓號皆名慈氏弟子。如我今日。諸聲聞皆稱釋迦弟子。爾時彌勒與諸弟子說法。汝等比丘當思惟無常之想。樂有苦想。計我無我想。實有空想。色變之想。青瘀之想。臃脹之想。食不消想。膿血想。一切世間不可樂想。所以然者。比丘當知。此十想者。皆是過去釋迦文佛與汝等說。令得盡有漏心得解脫。若此眾中釋迦文佛弟子。過去時修於梵行。來至我所。或復於釋迦文佛所。供養三寶。來至我所。或於釋迦文佛所。彈指之頃。修於善本。來至此間。或於釋迦文佛所。行四等心。來至此者。或於釋迦文佛所。受持五戒。三自歸法。來至我所。或於釋迦文佛所。起神寺廟。來至我所。或於釋迦文佛所。補治故寺。來至我所。或於釋迦文佛所。受八關齋法。來至我所。或於釋迦文佛所。香華供養。來至此者。或復於彼聞法。悲泣墮淚。來至我所。或復於彼聞法。專意聽受法。來至我所。或復盡形壽善修梵行。來至我所。或復有書寫讀誦。來至我所。或復承事供養。來至我所者。是時彌勒便說此偈。

增益戒聞德 禪及思惟業 善修於梵行

而來至我所 勤施發歡心 修行心原本  
意無若干想 皆來至我所 或發平等心  
承事於諸佛 飯飴於聖眾 皆來至我所  
或誦戒契經 善習與人說 熾然於法本  
今來至我所 釋種善能化 供養諸舍利  
承事法供養 今來至我所 若有書寫經  
班宣於素上 其有供養經 皆來至我所  
繒綵及諸物 供養於神寺 自稱南無佛  
皆來至我所 供養於現在 諸佛過去者  
禪定正平等 亦無有增減 是故於佛法  
承事於聖眾 專心事三寶 必至無為處

阿難當知。彌勒如來在彼眾中。當說此偈。爾時彼眾中。諸天人民。思惟此十想。十一。姪人諸塵垢。盡得法眼淨。彌勒如來千歲之中。眾僧無有瑕穢。爾時恒以一偈以為禁戒。

口意不行惡

身亦無所犯

當除此三行

速脫生死關

過千歲後。當有犯戒之人。遂復立戒。彌勒如來當壽八萬四千歲。般涅槃後。遺法當在八萬四千歲。所以然者。爾時眾生皆是利根。其有善男子善女人。欲得見彌勒佛及三會聲聞眾。及翅頭城及見蟻佉王。并四大藏珍寶者。欲食自然粳米者。并著自然衣裳。身壞命終。生天上者。彼善男子善女人。當勤加精進。無生懈怠。亦當供養承事諸法師。名花搗香。種種供養。無令有失。如是阿難。當作是學。爾時阿難及諸大會。聞佛所說歡喜奉行。

佛說彌勒下生經

按開元錄有譯無本。中有法護譯彌勒成佛經。一名彌

勒當來下生經者。乍觀此經。即彼失本而還得之。其實非也。何則。羅什譯彌勒成佛經。目下注云。與下生經異。本與法護譯彌勒成佛經同本。兩譯一闕。則彼失本經。非此下生經。六譯三失之一者。明矣。又按孤山智圓重校金剛般若後序云。古德分經。皆用紙數者。一紙有二十五行。一行十七字。今檢失本彌勒經。目下注云。一十七紙。則計有七千二百二十二字。此經只有三千一百七十六字。則尚未其半。豈是彼經歟。則丹藏無此經。為得然。此經文。頗似漢晉經注。又有漢云之言。還恐此是三失本中第一本錄。云今附西晉者耳。宋藏還得而編入之。為得之矣。而二錄並無下生經。是法護譯者。今云法護譯者何耶。伏俟賢哲。

佛說彌勒下生成佛經 No. 454 [Nos. 453, 455]

後秦龜茲國三藏鳩摩羅什譯

大智舍利弗能隨佛轉法輪。佛法之大將。憐愍眾生成白佛言。世尊。如前後經中說。彌勒當下作佛。願欲廣聞彌勒功德神力。國土莊嚴之事。眾生以何施何戒。何慧得見彌勒。爾時佛告舍利弗。我今廣為汝說。當一心聽。舍利弗。四大海水以漸減少。三千由旬。是時閻浮提地。長十千由旬。廣八千由旬。平坦如鏡。名華軟草。遍覆其地。種種樹木。華果茂盛。其樹悉皆高三十里。城邑次比鷄飛相及。人壽八萬四千歲。智慧威德。色力具足。安隱快樂。唯有三病。一者便利。二者飲食。三者衰老。女人年五百歲。爾乃行嫁。是時有一大城。名翅頭末。長十二由旬。廣七由旬。端嚴殊妙。莊嚴清淨。福德之人。充滿其中。以福德人。故豐樂安隱。其城七寶。上有樓

閣戶牖軒窓皆是眾寶，真珠羅網彌覆其上。街巷道陌廣十二里，掃灑清淨，有大龍王名曰多羅尸棄，其池近城，龍王宮殿在此池中。常於夜半降微細雨，用淹塵土，其地潤澤，譬若油漆，行人來往無有塵坌。時世人民福德所致，巷陌處處有明珠柱，皆高十里，其光明曜晝夜無異，燈燭之明不復為用。城邑舍宅及諸里巷，乃至無有細微土塊，純以金沙覆地，處處皆有金銀之聚。有大夜叉神名跋陀波羅賒塞迦，秦言善教常護此城，掃除清淨，若有便利不淨地，裂受之，受已還合。人命將終，自然行詣塚間而死。時世安樂無有怨賊劫竊之患，城邑聚落無閉門者，亦無衰惱水火刀兵，及諸饑饉毒害之難。人常慈心恭敬和順，調伏諸根，語言謙遜，舍利弗，我今為汝粗略說彼國界城邑富樂之事。其諸園林池泉之中，自然而有八功德水，青紅赤白雜色蓮花，遍覆其上。其池四邊四寶階道，眾鳥和集，鵝鴨鴛鴦，孔雀翡翠，鸚鵡舍利，鳩那羅，耆婆耆婆等，諸妙音鳥常在其中，復有異類妙音之鳥，不可稱數。果樹香樹充滿國內，爾時閻浮提中常有好香，譬如香山流水，美好味甘，除患雨澤，隨時穀稼滋茂，不生草穢。一種七種，用功甚少，所收甚多，食之香美，氣力充實。

其國爾時有轉輪王名曰蟻法，有四種兵，不以威武治四天下。其王千子勇健多力，能破怨敵。王有七寶：金輪寶、象寶、馬寶、珠寶、女寶、主藏寶、主兵寶。又其國土有七寶臺，舉高千丈，千頭千輪，廣六十丈，又有四大藏，一、大

藏，各有四億小藏圍繞，伊勒鉢大藏在乾陀羅國，般軸迦大藏在彌緹羅國，賓伽羅大藏在須羅吒國，蟻法大藏在波羅捺國。此四大藏縱廣千由旬，滿中珍寶，各有四億小藏附之。有四大龍王各自守護，此四大藏及諸小藏，自然踊出，形如蓮華，無央數人皆共往觀。是時眾寶無守護者，眾人見之心不貪著，棄之於地，猶如瓦石草木土塊。時人見者皆生厭心，而作是念：往昔眾生為此寶故，共相殘害，更相偷劫，欺誑妄語，令生死罪緣展轉增長。翅頭末城眾寶羅網彌覆其上，寶鈴莊嚴，微風吹動，其聲和雅，如扣鐘聲。

其城中有大婆羅門，主名曰妙梵，婆羅門女名曰梵摩波提，彌勒託生以為父母。身紫金，色三十二相，眾生視之無有厭足。身力無量，不可思議，光明照耀，無所障礙。日月火珠都不復現，身長千尺，胸廣三十丈，面長十二丈，四尺，身體具足，端正無比。成就相好如鑄金像，肉眼清淨，見十由旬，常光四照，面百由旬，日月火珠光不復現，但有佛光微妙第一。

彌勒菩薩觀世五欲，致患甚多，眾生沈沒在大生死，甚可憐愍。自以如是正念，觀故不樂在家。時蟻法王共諸大臣，持此寶臺奉上彌勒。彌勒受已，施諸婆羅門，婆羅門受已，即便毀壞，各共分之。彌勒菩薩見此妙臺，須臾無常，知一切法皆亦磨滅，修無常想，出家學道。坐於龍華菩提樹下，樹莖枝葉高五十里，即以出家日得阿耨多羅三藐三菩提。爾時諸天龍神王不現其身，而雨華香供養於佛。三

千大千世界皆大震動，佛身出光照無量國，應可度者皆得見佛。

爾時人民各作是念：雖復千萬億歲，受五欲樂，不能得免三惡道苦。妻子財產所不能救，世間無常，命難久保。我等今者宜於佛法修行。梵行，作是念已，出家學道。時蟻法王亦共八萬四千大臣，恭敬圍繞，出家學道。復有八萬四千諸婆羅門，聰明大智，於佛法中亦共出家。復有長者名須達那，今須達長者是。是人亦與八萬四千人俱共出家。復有梨師達多，富蘭那兄弟，亦與八萬四千人出家。復有二大臣，一名栴檀，二名須曼，王所愛重，亦與八萬四千人俱於佛法中出家。蟻法王寶女名舍彌婆帝，今之毘舍法是也，亦與八萬四千婦女俱共出家。蟻法王太子名曰天色，今提婆娑那是，亦與八萬四千人俱共出家。彌勒佛親族婆羅門子，名須摩提利根智慧，今鬱多羅是，亦與八萬四千人俱於佛法中出家。如是等無量千萬億眾，見世苦惱，皆於彌勒佛法中出家。

爾時彌勒佛見諸大眾作是念言：今諸人等不以生天樂故，亦復不為今世樂故，來至我所。但為涅槃常樂因緣，是諸人等皆於佛法中種諸善根。釋迦牟尼佛遣來付我，是故今者皆至我所。我今受之，是諸人等或以讀誦分別決定修妬路毘尼阿毘曇藏，修諸功德。來至我所，或以衣食，施人持戒智慧，修此功德。來至我所，或以幡蓋華香供養於佛，修此功德。來至我所，或以布施持齋修習慈心，行

此功德來至我所。或為苦惱眾生令其得樂。修此功德來至我所。或以持戒忍辱修清淨慈。以此功德來至我所。或以施僧常食齋講。設會供養飯食。修此功德來至我所。或以持戒多聞修行禪定無漏智慧。以此功德來至我所。或以起塔供養舍利。以此功德來至我所。善哉釋迦牟尼佛。能善教化如是等百千萬億眾生。令至我所。彌勒佛如是三稱讚釋迦牟尼佛。然後說法。而作是言。汝等眾生能為難事。於彼惡世貪欲瞋恚愚癡迷惑短命人中。能修持戒作諸功德。甚為希有。爾時眾生不識父母沙門婆羅門。不知道法。互相惱害。近刀兵劫。深著五欲嫉妬諂曲。佞濁邪偽。無憐愍心。更相殺害食肉飲血。汝等能於其中修行善事。是為希有。善哉釋迦牟尼佛。以大悲心。能於苦惱眾生之中。說誠實語。示我當來度脫汝等。如是之師。甚為難遇。深心憐愍惡世眾生。救拔苦惱。令得安隱。釋迦牟尼佛為汝等故。以頭布施割截耳鼻手足支體。受諸苦惱。以利汝等。彌勒佛如是開導安慰。無量眾生。令其歡喜。然後說法。福德之人。充滿其中。恭敬信受。渴仰大師。各欲聞法。皆作是念。五欲不淨。眾苦之本。又能除捨憂感。愁惱。知苦樂法。皆是無常。彌勒佛觀察時。會大眾心淨調柔。為說四諦。聞者同時得涅槃道。

爾時彌勒佛於華林園。其園縱廣一百由旬。大眾滿中。初會說法九十六億人。得阿羅漢。第二大會說法九十四億人。得阿羅漢。第三大會說法九十二億人。得阿羅漢。彌勒佛既

轉法輪度天人。已將諸弟子入城乞食。無量淨居天眾恭敬從佛。入翅頭末城。當入城時。現種種神力。無量變現。釋提桓因與欲界諸天。梵天王與色界諸天。作百千伎樂歌詠。佛德。雨天諸華。梅檀末香。供養於佛。街巷道陌。豎諸幡蓋。燒眾名香。其煙如雲。世尊入城時。大梵天王釋提桓因合掌恭敬。以偈讚曰。

正遍知者兩足尊 天人世間無與等  
十力世尊甚希有 無上最勝良福田  
其供養者生天上 稽首無比大精進

爾時天人羅刹等見大力魔。佛降伏之。千萬億無量眾生皆大歡喜。合掌唱言。甚為希有。甚為希有。如來神力功德具足。不可思議。是時天人以種種雜色蓮花及曼陀羅花。散佛前地。積至于膝。諸天空中作百千伎樂歌歎。佛德。爾時魔王於初夜後夜覺諸人民。作如是言。汝等既得人身。值遇好時。不應竟夜眠。睡覆心。汝等若立若坐。常勤精進。正念諦觀。五陰無常。苦空無我。汝等勿為放逸。不行佛教。若起惡業。後必致悔。時街巷男女皆効此語。言汝等勿為放逸。不行佛教。若起惡業。後必有悔。當勤方便。精進求道。莫失法利。而徒生徒死也。如是大師拔苦惱者。甚為難遇。堅固精進。當得常樂涅槃。

爾時彌勒佛諸弟子。普皆端正。威儀具足。厭生老病死。多聞廣學。守護法藏。行於禪定。得離諸欲。如鳥出殼。爾時彌勒佛欲往長老。大迦葉所。即與四眾俱。就耆闍崛山。於山頂上。見大迦葉。時男女大眾心皆驚怪。彌勒佛讚

言大迦葉比丘。是釋迦牟尼佛大弟子。釋迦牟尼佛於大眾中。常所讚歎。頭陀第一。通達禪定。解脫三昧。是人雖有大神力。而無高心。能令眾生得大歡喜。常愍下賤貧惱眾生。救拔苦惱。令得安隱。彌勒佛讚大迦葉骨身言。善哉大神德。釋師子大弟子。大迦葉。於彼惡世。能修其心。爾時人眾見大迦葉為彌勒佛所讚。百千億人。因是事。已厭世得道。是諸人等。念釋迦牟尼佛。於惡世中。教化無量眾生。令得具六神通。成阿羅漢。爾時說法之處。廣八十由旬。長百由旬。其中人眾若坐若立。若近若遠。各各自見佛在其前。獨為說法。彌勒佛住世六萬歲。憐愍眾生。令得法眼。滅度之後。法住於世。亦六萬歲。汝等宜應精進。發清淨心。起諸善業。得見世間燈明彌勒佛身。必無疑也。佛說是經已。舍利弗等歡喜受持。佛說彌勒下生成佛經

佛說彌勒下生成佛經 No. 455 [Nos. 453, 454]

唐三藏法師義淨奉 制譯

如是我聞。一時薄伽梵在王舍城鷲峯山上。與大苾芻眾俱。爾時大智舍利子法將中。最哀愍世間。從座而起。偏袒右肩。右膝著地。合掌恭敬。而白佛言。世尊。我今欲少諮問。願垂聽許。佛告舍利弗。隨汝所問。我當為說。時舍利子即以伽他請世尊曰。 大師所授記。 當來佛下生。 彼號為慈氏。 如前後經說。 唯願人中尊。 伽陀重分別。 彼神通威德。

我今樂欲聞 佛告舍利子 應至心諦聽  
當來慈氏尊 為汝廣宣說 爾時大海水  
以漸減三千 二百踰繕那 為顯輪王路  
瞻部洲縱廣 有萬踰繕那 有情住其中  
在處皆充滿 國土咸富盛 無罰無災厄  
彼諸男女等 皆由善業生 地無諸棘刺  
唯生青軟草 履踐隨人足 喻若覩羅綿  
自然出香稻 美味皆充足 諸樹生衣服  
眾綵共莊嚴 樹高三俱舍 花菓常充實  
時彼國中人 皆壽八萬歲 無有諸疾苦  
離惱常安樂 具相悉端嚴 色力皆圓滿  
人患有三種 食衰老便利 女年五百歲  
方乃作婚姻 諸有欲便利 地裂而容受  
人命將終盡 自往詣屍林 城名妙幢相  
輪王之所都 縱十二由旬 廣七由旬量  
其中所居者 皆曾植妙因 此城有勝德  
住者咸歡喜 樓臺并却敵 七寶之所成  
關鑰及門庭 種種寶嚴飾 繞堞諸隍塹  
皆營以妙珍 名花悉充滿 好鳥皆翔集  
七行多羅樹 周匝而圍遶 眾寶以莊嚴  
皆懸網鈴鐸 微風吹寶樹 演出眾妙聲  
猶如奏八音 聞者生歡喜 處處有池沼  
彌覆雜色花 園苑擢芳林 莊嚴此城郭  
國中有聖主 其名曰餉佉 金輪王四洲  
富盛多威力 其王福德業 勇健兼四兵  
七寶皆成就 千子悉具足 四海咸清肅  
無有戰兵戈 正法理群生 設化皆平等  
王有四大藏 各在諸國中 一一藏皆有  
珍寶百萬億 羯陵伽國內 藏名水竭羅

蜜絺羅國中 般逐迦大藏 伊羅鉢羅藏  
安處捷陀國 婆羅痾斯境 藏名為餉佉  
此諸四伏藏 咸屬餉佉王 百福之所資  
果報咸成就 輔國之大臣 婆羅門善淨  
四明皆曉達 多聞為國師 博通諸雜論  
善教有聞持 訓解及聲明 莫不咸究了  
有女名淨妙 為大臣夫人 名稱相端嚴  
見者皆歡悅 大丈夫慈氏 辭於喜足天  
來託彼夫人 作後身生處 既懷此大聖  
滿足於十月 於是慈尊母 往趣妙花園  
至彼妙園中 不坐亦不臥 徐立攀花樹  
俄誕勝慈尊 爾時最勝尊 出母右脇已  
如日出雲翳 普放大光明 不染觸胞胎  
當爾降生時 千眼帝釋主 躬自擎菩薩  
欣逢兩足尊 菩薩於此時 自然行七步  
而於足履處 皆出寶蓮花 遍觀於十方  
告諸天人眾 我此身最後 無生證涅槃  
龍降清涼水 澡沐大悲身 天散殊妙花  
虛空遍飄灑 諸天持白蓋 掩庇大慈尊  
各生希有心 守護於菩薩 祿母擎菩薩  
三十二相身 具足諸光明 捧持來授母  
御者進雕輦 皆用寶莊嚴 母子昇其中  
諸天共持輿 千種妙音樂 引導而還宮  
慈氏入都城 天花如雨落 慈尊誕降日  
懷妊諸姪女 普得身安隱 皆生智慧男  
善淨慈尊父 覩子奇妙容 具三十二相  
心生大歡喜 父依占察法 知子有二相  
處俗作輪王 出家成正覺 菩薩既成立

慈愍諸群生 眾苦險難中 輪迴常不息  
金色光明朗 聲如大梵音 目等青蓮葉  
支體悉圓滿 身長八十肘 二十肘肩量  
面廣肩量半 滿月相端嚴 菩薩明眾藝  
善教受學者 請業童蒙等 八萬四千人  
時彼餉佉王 建立七寶幢 幢高七十尋  
廣有尋六十 寶幢造成已 王發大捨心  
施與婆羅門 等設無遮會 其時諸梵志  
數有一千人 得此妙寶幢 毀圻須臾頃  
菩薩覩斯已 念世俗皆然 生死苦羈籠  
思求於出離 祈誠寂滅道 棄俗而出家  
生老病死中 救之令得出 慈尊與願曰  
八萬四千人 俱生厭離心 並隨修梵行  
於初發心夜 捨俗而出家 還於此夜中  
而昇等覺地 時有菩提樹 號名曰龍花  
高四踰繕那 莠鬱而榮茂 枝條覆四面  
蔭六俱盧舍 慈氏大悲尊 於下成正覺  
於人中尊勝 具八梵音聲 說法度眾生  
令離諸煩惱 苦及苦生處 一切皆除滅  
能修八正道 登彼涅槃岸 為諸清信者  
說此四真諦 得聞此妙法 至誠而奉持  
於妙花園中 諸眾如雲集 滿百由旬內  
眷屬皆充滿 彼輪王餉佉 聞深妙法已  
罄捨諸珍寶 祈心慕出家 不戀上宮闈  
至求於出離 八萬四千人 咸隨而出家  
復八萬四千 婆羅門童子 聞王捨塵俗  
亦來求出家 主藏臣長者 其名曰善財  
并與千眷屬 亦來求出家 寶女毘舍佉  
及餘諸從者 八萬四千人 亦來求出家

復過百千數	善男善女等	聞佛宣妙法
亦來求出家	無上天人尊	大慈悲聖主
普觀眾心已	而演出要法	告眾汝應知
慈悲釋迦主	教汝修正道	來生我法中
或以香花鬘	幢幡蓋嚴飾	供養牟尼主
來生我法中	或鬱金沈水	香泥用塗拭
供養牟尼塔	來生我法中	或歸佛法僧
恭敬常親近	當修諸善行	來生我法中
或於佛法中	受持諸學處	善護無缺犯
來生我法中	或於四方僧	施衣服飲食
並奉妙醫藥	來生我法中	或於四齋辰
及在神通月	受持八支戒	來生我法中
或以三種通	神境記教授	化道聲聞眾
咸令煩惑除	初會為說法	廣度諸聲聞
九十六億人	令出煩惱障	第二會說法
廣度諸聲聞	九十四億人	令渡無明海
第三會說法	廣度諸聲聞	九十二億人
令心善調伏	三轉法輪已	人天普純淨
將諸弟子眾	乞食入城中	既入妙幢城
衢巷皆嚴飾	為供養佛故	天雨曼陀花
四王及梵王	並餘諸天眾	香花鬘供養
輔翼大悲尊	大威德諸天	散以妙衣服
繽紛遍城邑	瞻仰大醫王	以妙寶香花
散灑諸衢街	履踐於其上	喻若覩羅綿
音樂及幢幡	夾路而行列	人天帝釋眾
稱讚大慈尊	南謨天上尊	南謨士中勝
善哉薄伽梵	能哀愍世間	有大威德天
當作魔王眾	歸心合掌禮	讚仰於導師
梵王諸天眾	眷屬而圍遶	各以梵音聲

闡揚微妙法 於此世界中 多是阿羅漢  
 蠲除有漏業 永離煩惱苦 人天龍神等  
 乾闥阿修羅 羅刹及藥叉 皆歡喜供養  
 彼時諸大眾 斷障除疑惑 超越生死流  
 善修清淨行 彼時諸大眾 離著棄珍財  
 無我我所心 善修清淨行 彼時諸大眾  
 毀破貪愛網 圓滿靜慮心 善修清淨行  
 慈氏天人尊 哀愍有情類 期於六萬歲  
 說法度眾生 化滿百千億 令度煩惱海  
 有緣皆拯濟 方入涅槃城 慈氏大悲尊  
 入般涅槃後 正法住於世 亦滿六萬年  
 若於我法中 深心能信受 當來下生日  
 必奉大悲尊 若有聰慧者 聞說如是事  
 誰不起欣樂 願逢慈氏尊 若求解脫人  
 希遇龍花會 常供養三寶 當勤莫放逸  
 爾時世尊為舍利子及諸大眾記說當來慈  
 氏事已復告舍利子若有善男子善女人聞此  
 法已受持讀誦為他演說如說修行香花供  
 養書寫經卷是諸人等當來之世必得值遇  
 慈氏下生於三會中咸蒙救度爾時世尊說  
 此頌已舍利子及諸大眾歡喜信受頂戴奉行  
 佛說彌勒下生成佛經 按開元錄彌勒下生  
 經前後六譯三存三失而此本亦在三存之一也  
 則宋藏無此經者失之耳今得於丹藏而編入之

佛說彌勒大成佛經

姚秦龜茲國三藏鳩摩羅什譯

No. 456

如是我聞一時佛住摩伽陀國波沙山孤絕過

去諸佛常降魔處夏安居中與舍利弗經行山  
 頂而說偈言 一心善諦聽 光明大三昧  
 無比功德人 正爾當出世 彼人說妙法  
 悉皆得充足 如渴飲甘露 疾至解脫道  
 時四部眾平治道路灑掃燒香皆悉來集持  
 諸供具供養如來及比丘僧諦觀如來喻如  
 孝子視於慈父如渴思飲愛念法父亦復如  
 是各各同心欲請法王轉正法輪諸根不動  
 心心相次流注向佛是時比丘比丘尼優婆  
 塞優婆夷天龍鬼神乾闥婆阿修羅迦樓羅  
 緊那羅摩睺羅伽人非人等各從坐起右遶  
 世尊五體投地向佛泣淚爾時大智舍利弗  
 齊整衣服偏袒右肩知法王心善能隨順學  
 佛法王轉正法輪是佛輔臣持法大將憐愍  
 眾生故欲令脫苦縛白佛言世尊如來向者  
 於山頂上說偈讚歎第一智人前後經中之  
 所未說此諸大眾心皆渴仰淚如盛雨欲聞  
 如來說未來佛開甘露道彌勒名字功德神  
 力國土莊嚴以何善根何戒何施何定何慧  
 何等智力得見彌勒於何心中修八正路  
 舍利弗發此問時百千天子無數梵王合掌  
 恭敬異口同音共發是問白佛言世尊願使  
 我等於未來世得見人中最大果報三界眼  
 目光明彌勒普為眾生說大慈悲并八部眾  
 亦皆如此恭敬叉手勸請如來爾時梵王與  
 諸梵眾異口同音合掌讚歎而說頌曰

南無滿月	具足十力	大精進將
勇猛無畏	一切智人	超出三有
成三達智	降伏四魔	身為法器

心如虛空 靜然不動 於有非有  
於無非無 達解空法 世所讚歎  
我等同心 一時歸依 願轉法輪

爾時世尊告舍利弗，當為汝等廣分別說，諦聽諦聽，善思念之。汝等今者以妙善心，欲問如來無上道業摩訶般若。如來明見如觀掌中菴摩勒果，告舍利弗，若於過去七佛所得聞佛名禮拜供養，以是因緣，淨除業障，復聞彌勒大慈根本得清淨心。汝等今當一心合掌，歸依未來大慈悲者，我當為汝廣分別說。彌勒佛國從於淨命無諸諂偽，檀波羅蜜尸羅波羅蜜般若波羅蜜，得不受不著，以微妙十願大莊嚴，得一切眾生起柔軟心，得見彌勒大慈所攝，生彼國土調伏諸根，隨順佛化舍利弗，四大海水面各減少三千由旬。時閻浮提地縱廣正等十千由旬，其地平淨如琉璃鏡，大適意華，悅可意華，極大香華，優曇鉢花，大金葉華，七寶葉華，白銀葉華，華鬚柔軟，狀如天繒，生吉祥菓香味具足，軟如天綿，叢林樹華甘果美妙，極大茂盛，過於帝釋歡喜之園。其樹高顯高三十里，城邑次比雞飛相及，皆由今佛種大善根，行慈心報，俱生彼國智慧威德，五欲眾具快樂安隱，亦無寒熱風火等病，無九惱苦，壽命具足八萬四千歲，無有中夭，人身悉長一十六丈，日日常受極妙安樂，遊深禪定以為樂器，唯有三病，一者飲食，二者便利，三者衰老。女人年五百歲，爾乃行嫁，有一大城名翹頭末，縱廣一千二百由旬，高七由旬，七寶莊嚴，自然化生七寶樓閣，

端嚴殊妙，莊校清淨，於窓牖間列諸寶女，手中皆執真珠羅網，雜寶莊校以覆其上，密懸寶鈴，聲如天樂。七寶行樹，樹間渠泉，皆七寶成，流異色水，更相映發，交橫徐逝，不相妨礙。其岸兩邊純布金沙，街巷道陌廣十二里，悉皆清淨，猶如天園，掃灑清淨，有大龍王名多羅尸棄，福德威力皆悉具足，其池近城，龍王宮殿如七寶樓，顯現于外，常於夜半化作人像，以吉祥瓶盛香，色水灑淹塵土，其地潤澤，譬如油塗，行人往來無有塵空，是時世人福德所致，巷陌處處有明珠柱，光喻於日，四方各照八十由旬，純黃金色，其光照耀晝夜無異，燈燭之明，猶若聚墨，香風時來，吹明珠柱，雨寶瓔珞，眾人皆用服者，自然如三禪樂，處處皆有金銀珍寶，摩尼珠等，積用成山。寶山放光普照城內，人民遇者皆悉歡喜，發菩提心，有大夜叉神名跋陀婆羅，除塞迦善教，晝夜擁護，翹頭末城及諸人民，灑掃清淨，設有便利地，裂受之，受已還合，生赤蓮華以蔽穢氣。時世人民若年衰老，自然行詣山林樹下，安樂淡泊，念佛取盡，命終多生大梵天上，及諸佛前，其土安隱，無有怨賊劫竊之患，城邑聚落無閉門者，亦無衰惱水火刀兵，及諸飢饉毒害之難，人常慈心恭敬和順，調伏諸根，如子愛父，如母愛子，語言謙遜，皆由彌勒慈心訓導，持不殺戒，不噉肉，故以此因緣，生彼國者，諸根恬靜，靜面貌端正，威相具足，如天童子，復有八萬四千眾寶小城，以為眷屬，翹頭末城最處其中，男女大小雖遠若近，佛神力故，

兩得相見，無所障礙。夜光摩尼如意珠華，遍滿世界，雨七寶花，鉢頭摩華，優鉢羅華，拘物頭華，分陀利華，曼陀羅華，摩訶曼陀羅花，曼殊沙花，摩訶曼殊沙華，彌布其地，或復風吹迴旋空中，時彼國界城邑聚落園林浴池泉河流沼，自然而有八功德水，命命之鳥，鵝鴨鴛鴦，孔雀鸚鵡，翡翠舍利，美音鳩鵲，羅耆婆，閻婆快見鳥等，出妙音聲，復有異類妙音之鳥，不可稱數，遊集林池，金色無垢淨光明華，無憂淨慧日光明華，鮮白七日香華，瞻蔔六色香華，百千萬種水陸生華，青色青光，黃色黃光，赤色赤光，白色白光，香淨無比，晝夜常生，終無萎時，有如意果樹，香美無比，充滿國界，香樹金光生寶山間，充滿國界，出適意香，普熏一切。爾時閻浮提中常有好香，譬如香山，流水美好，味甘除患，雨澤隨時，天園成熟，香美稻種，天神力故，一種七穫，用功甚少，所收甚多，穀稼滋茂，無有草穢，眾生福德，本事果報，入口銷化，百味具足，香美無比，氣力充實。其國爾時有轉輪聖王，名曰穰佉，有四種兵，不以威武治四天下，具三十二大人相好，王有千子，勇猛端正，怨敵自伏，王有七寶，一金輪寶，千輻轆轤皆悉具足，二白象寶，白如雪山，七牝牘地，嚴顯可觀，猶如山王，三紺馬寶，朱鬣鬚尾，足下生華，七寶蹄甲，四神珠寶，明顯可觀，長於二肘，光明雨寶，適眾生願，五玉女寶，顏色美妙，柔軟無骨，六主藏臣，口中吐寶，足下雨寶，兩手出寶，七主兵臣，宜動身時，四兵如雲從空而出，千子七寶國界人民，一

切相視不懷惡意。如母愛子。時王千子各取珍寶。於正殿前作七寶臺。有三十重。高三十由旬。千頭千輪遊行自在。有四大寶藏。一大藏各有四億小藏圍繞。伊鉢多大藏在乾陀羅國。般軸迦大藏在彌提羅國。賓伽羅大藏在須羅吒國。穰佉大藏在婆羅捺國。古仙山處。此四大藏自然開發。顯大光明。縱廣正等一千由旬。滿中珍寶。各有四億小藏。附之有四大龍。各自守護。此四大藏及諸小藏。自然踊出。形如蓮華。無央數人皆共往觀。是時眾寶無守護者。眾人見之心不貪著。棄之於地。猶如瓦石草木土塊。時人見者。心生厭離。各各相謂而作是言。如佛所說。往昔眾生為此寶。故共相殘害。更相偷劫。欺誑妄語。令生死苦緣展轉增長。墮大地獄。翅頭末城。眾寶羅網彌覆其上。寶鈴莊嚴。微風吹動。其音和雅。如扣鐘磬。演說歸依佛。歸依法。歸依僧。時城中有大婆羅門主。名修梵摩。婆羅門女名梵摩拔提。心性和弱。彌勒託生以為父母。雖處胞胎。如遊天宮。放大光明。塵垢不障。身紫金。色具三十二大丈夫相。坐寶蓮華。眾生視之。無有厭足。光明晃耀。不可勝視。諸天世人所未曾覩。身力無量。一節力普勝一切大力龍象。不可思議。毛孔光明。照耀無量。無有障礙。日月星宿。水火珠光。皆悉不現。猶如埃塵。身長釋迦牟尼佛八十肘<sup>三寸</sup>。脇廣二十五肘<sup>十寸</sup>。面長十二肘<sup>半</sup>。鼻高修直。當于面門。身相具足。端正無比。成就相好。一一相八萬四千好。以自莊嚴。如鑄金像。一一好中流

出光明照千由旬。肉眼清徹。青白分明。常光繞身。面百由旬。日月星宿。真珠摩尼。七寶行樹。皆悉明耀。現於佛光。其餘眾光不復為用。佛身高顯。如黃金山。見者自然脫三惡趣。爾時彌勒諦觀世間。五欲過患。眾生受苦。沈沒長流。在大生死。甚可憐愍。自以如是正念。觀察苦空無常。不樂在家。厭家迫迮。猶如牢獄。時穰佉王共諸大臣。國土人民。持七寶臺。有千寶帳。及千寶軒。千億寶鈴。千億寶幡。寶器千口寶甕。千口奉上彌勒。彌勒受已。施諸婆羅門。婆羅門受已。即便毀壞。各共分之。諸婆羅門。觀見彌勒。能作大施。生大奇特心。彌勒菩薩見此寶臺。須臾無常。知有為法。皆悉磨滅。修無常想。讚過去佛。清涼甘露無常之偈。

諸行無常

是生滅法

生滅滅已

寂滅為樂

說此偈已。出家學道。坐於金剛莊嚴道場。龍花菩提樹下。枝如寶龍。吐百寶華。一一花葉作七寶色。色色異果。適眾生意。天上人間。為無有比。樹高五十由旬。枝葉四布。放大光明。爾時彌勒與八萬四千婆羅門。俱詣道場。彌勒即自剃髮出家學道。早起出家。即於是日初夜降。四種魔。成阿耨多羅三藐三菩提。即說偈言。久念眾生苦。欲拔無由脫。今者證菩提。霍然無所礙。亦達眾生空。本性相如實。永更無憂苦。慈悲亦無緣。本為救汝等。國城及頭目。妻子與手足。施人無有數。今始得解脫。無上大寂滅。當為汝等說。廣開甘露道。如是大果報。皆從施戒慧。

六種大忍生。亦從大慈悲。無染功德得。說此偈已。默而住。時諸天龍鬼神。王不現其身。而雨天花。供養於佛。三千大千世界。六變震動。佛身出光照於無量。應可度者。皆得見佛。爾時釋提桓因。護世天王。大梵天王。無數天子。於花林園。頭面禮足。合掌勸請。轉於法輪。時彌勒佛。默然受請。告梵王言。我於長夜受大苦惱。修行六度。始於今日。法海滿。建法幢。擊法鼓。吹法蠡。雨法雨。正爾當為汝等說法。諸佛所轉八聖道輪。諸天世人。無能轉者。其義平等。直至無上。無為寂滅。為諸眾生。斷長夜苦。此法甚深。難得難入。難信難解。一切世間。無能知者。無能見者。洗除心垢。得萬梵行。說是語時。復有他方。無數百千萬億天子。天女。大梵天王。乘天宮殿。持天花香。奉獻如來。繞百千匝。五體投地。合掌勸請。諸天伎樂。不鼓自鳴。時諸梵王。異口同聲。而說偈言。無量無數歲。空過無有佛。眾生墮惡道。世間眼目滅。二惡道增廣。諸天路永絕。今日佛興世。三惡道殄滅。增長天人眾。願開甘露門。令眾心無著。疾疾得涅槃。我等諸梵王。聞佛出世間。今者得值佛。無上大法王。梵天宮殿盛。身光亦明顯。普為十方眾。勸請大導師。唯願開甘露。轉無上法輪。說此偈已。頭面作禮。復更合掌。殷懃三請。唯願世尊。轉於甚深微妙法輪。為拔眾生苦惱。根栽。遠離三毒。破四惡道。不善之業。爾時世尊。為諸梵王。即便微笑。出五色光。默然許之。時諸天子。無數大眾。聞佛許可。歡喜



無量遍體踊躍，譬如孝子新喪慈父，忽然還活，大眾歡喜亦復如是。時諸天眾右遶世尊，經無數匝，敬愛無厭，却住一面。

爾時大眾皆作是念：雖復千億歲受五欲樂，不能得免三惡道苦。妻子財產所不能救，世間無常命難久保。我等今者於佛法中淨修梵行，作是念已，復更念言：設受五欲經無數劫，如無想天壽無量億歲，與諸姪女共相娛樂，受細滑觸，會歸磨滅，墮三惡道受無量苦。所樂無幾，猶如幻化，蓋不足言。入地獄時大火洞然，百億萬劫受無量苦，求脫叵得。如此長夜苦厄難拔，今日遇佛，宜勤精進。時穰佉王高聲唱言：

設復生天樂，會亦歸磨滅，不久墮地獄，猶如猛火聚。我等宜時速出家學佛，道說是語已，時穰佉王與八萬四千大臣恭敬圍繞，及四天王送轉輪王，至花林園龍花樹下，詣彌勒佛求索出家，為佛作禮，未舉頭頃，鬚髮自落，袈裟著身，便成沙門。

時彌勒佛共穰佉王與八萬四千大臣諸比丘等恭敬圍繞，并與無數天龍八部入翅頭末城，足躡門闥，娑婆世界六種震動，閻浮提地化為金色，翅頭末大城中央其地金剛，有過去諸佛所坐金剛寶座自然踊出，眾寶行樹，天於空中雨大寶華，龍王作眾伎樂，口中吐華毛孔雨華用供養佛。佛於此座轉正法輪，謂是苦苦聖諦，謂是集集聖諦，謂是滅滅聖諦，謂是道道聖諦，并為演說三十七品助菩提法，亦為宣說十二因緣，無明緣行，行緣

識，識緣名色，名色緣六入，六入緣觸，觸緣受，受緣愛，愛緣取，取緣有，有緣生，生緣老死憂悲苦惱等。爾時大地六種震動，如此音聲聞于三千大千世界，復過是數無量無邊，下至阿鼻地獄，上至阿迦膩吒天，時四天王各各將領無數鬼神，高聲唱言：佛日出時降法雨，露，世間眼目今者始開，普令大地一切八部，於佛有緣皆得聞知。三十三天夜摩天兜率陀天化樂天，他化自在天，乃至大梵天，各各於己所統領處高聲唱言：佛日出世降注甘露，世間眼目今者始開，有緣之者皆悉聞知。

時諸龍王八部山神樹神藥草神水神風神火神地神城池神屋宅神等，踊躍歡喜高聲唱言：復有八萬四千諸婆羅門聰明大智，於佛法中亦隨大王出家學道，復有長者名須達那，今須達長者是，亦與八萬四千人俱共出家，復有梨師達多富蘭那兄弟，亦與八萬四千人俱共出家，復有二大臣，一名梵檀末利，二名須曼那，王所愛重，亦與八萬四千人俱，於佛法中出家學道，轉輪王寶女名舍彌婆帝，今之毘舍佉母是也，亦與八萬四千婦女俱共出家，穰佉太子名天金色，今提婆婆那長者子是，亦與八萬四千人俱共出家，彌勒佛親族婆羅門子，名須摩提利根智慧，今鬱多羅善賢比丘尼子是，亦與六萬人俱於佛法中俱共出家，穰佉王千子唯留一人，用嗣王位，餘九百九十九人亦與八萬四千人於佛法中俱共出家，如是等無量億眾，見世苦惱五陰熾然，皆於彌勒佛法中俱共出家。

爾時彌勒佛以大慈心語諸大眾言：汝等今者不以生天樂故，亦復不為今世樂故，來至我所，但為涅槃常樂因緣，是諸人等皆於佛法中種諸善根，釋迦牟尼佛出五濁世，種種呵責為汝說法，無奈汝何，教殖來緣，今得見我，我今攝受是諸人等，或以讀誦分別決定修多羅毘尼阿毘曇，為他演說讚歎義味，不生嫉妬，教於他人，令得受持，修諸功德，來生我所，或以衣食施人，持戒智慧，修此功德，來生我所，或以妓樂幡蓋華香燈明供養於佛，修此功德，來生我所，或以施僧常食，起立僧房，四事供養，持八戒齋，修習慈心，行此功德，來生我所，或為苦惱眾生，深生慈悲，以身代受，令其得樂，修此功德，來生我所，或以持戒忍辱修淨慈心，以此功德，來生我所，或造僧祇四方無礙齋講，設會供養飯食，修此功德，來生我所，或以持戒多聞修行，禪定無漏智慧，以此功德，來生我所，或有起塔供養舍利，念佛法身，以此功德，來生我所，或有厄困貧窮，孤獨繫屬於他，王法所加，臨當刑戮，作八難業，受大苦惱，拔濟彼等，令得解脫，修此功德，來生我所，或有恩愛別離，朋黨諍訟，極大苦惱，以方便力，令得和合，修此功德，來生我所，說是語已，稱讚釋迦牟尼佛善哉善哉，能於五濁惡世，教化如是等百千萬億諸惡眾生，令修善本，來生我所，時彌勒佛如是三稱讚釋迦牟尼佛，而說偈言：

忍辱勇猛大導師，能於五濁不善世，教化成熟惡眾生，令彼修行得見佛。

荷負眾生受大苦 今入常樂無為處  
教彼弟子來我所 我今為汝說四諦  
亦說三十七菩提 莊嚴涅槃十二緣  
汝等宜當觀無為 入於空寂本無處

說此偈已復更讚歎彼時眾生於苦惡世能  
為難事貪欲瞋恚愚癡迷惑短命人中能修  
持戒作諸功德甚為希有爾時眾生不識父  
母沙門婆羅門不知道法互相惱害近刀兵  
劫深著五欲嫉妬諂佞曲濁邪偽無憐愍心  
更相殺害食肉飲血不敬師長不識善友不  
知報恩生五濁世不知慚愧晝夜六時相續  
作惡不知厭足純造不善五逆惡聚魚鱗相  
次求不知厭九親諸族不能相濟善哉善哉  
釋迦牟尼佛以大方便深厚慈悲能於苦惱  
眾生之中和顏美色善巧智慧說誠實語示  
我當來度脫汝等如是導師明利智慧世間  
希有甚為難遇深心憐愍惡世眾生為拔苦  
惱令得安隱入第一義甚深法性釋迦牟尼  
三阿僧祇劫為汝等故修行難行苦行以頭  
布施割截耳鼻手足肌體受諸苦惱為八聖  
道平等解脫利汝等故時彌勒佛如是開導  
安慰無量諸眾生等令其歡喜彼時眾生身  
純是法心純是法口常說法福德智慧之人  
充滿其中天人恭敬信受渴仰時大導師各  
欲令彼聞於往昔苦惱之事復作是念五欲  
不淨眾苦之本又能除捨憂感愁恨知苦樂  
法皆是無常為說色受想行識苦空無常無  
我說是語時九十六億人不受諸法漏盡意  
解得阿羅漢三明六通具八解脫三十六萬

天子二十萬天女發阿耨多羅三藐三菩提  
心天龍八部中有得須陀洹者種辟支佛道  
因緣者發無上道心者數甚眾多不可稱計  
爾時彌勒佛與九十六億大比丘眾并穰佉  
王八萬四千大臣比丘眷屬圍繞如月天子  
諸星宿從出翅頭末城還花林園重閣講堂  
時閻浮提城邑聚落小王長者及諸四姓皆  
悉來集龍花樹下花林園中爾時世尊重說  
四諦十二因緣九十四億人得阿羅漢他方  
諸天及八部眾六十四億恒河沙人發阿耨  
多羅三藐三菩提心住不退轉第三大會九  
十二億人得阿羅漢三十四億天龍八部發  
三菩提心時彌勒佛說四聖諦深妙法輪度  
天人已將諸聲聞弟子天龍八部一切大眾  
入城乞食無量淨居天眾恭敬從佛入翅頭  
末城當入城時佛現十八種神足身下出水  
如摩尼珠化成光臺照十方界身上出火如  
須彌山流紫金光現大滿空化成琉璃大復  
現小如芥子許泯然不現於十方踊於十方  
沒令一切人皆如佛身種種神力無量變現  
令有緣者皆得解脫釋提桓因三十二輔臣  
與欲界諸天梵天王與色界諸天并天子天  
女脫天瓔珞及以天衣而散佛上時諸天衣  
化成花蓋諸天妓樂不鼓自鳴歌詠佛德密  
雨天花栴檀雜香供養於佛街巷道陌豎諸  
幢幡燒諸名香其煙若雲世尊入城時大梵  
天王釋提桓因合掌恭敬以偈讚佛

正遍知者兩足尊 天人世間無與等  
十力世尊甚希有 無上最勝良福田

其供養者生天上 未來解脫住涅槃  
稽首無上大精進 稽首慈心大導師  
東方天王提頭賴吒南方天王毘樓勒叉西  
方天王毘留博叉北方天王毘沙門王與其  
眷屬恭敬合掌以清淨心讚歎世尊

三界無有比 大悲自莊嚴 體解第一義  
不見眾生性 及與諸法相 同入空寂性  
善住無所有 雖行大精進 無為無足跡  
我今稽首禮 慈心大導師 眾生不見佛  
長夜受生死 墜墮三惡道 及作女人身  
今日佛興世 拔苦施安樂 三惡道已少  
女人無諂曲 皆當得止息 具足大涅槃  
大悲濟苦者 施樂故出世 本為菩薩時  
常施一切樂 不殺不惱他 忍心如大地  
我今稽首禮 忍辱大導師 我今稽首禮  
慈悲大丈夫 自免生死苦 能拔眾生厄  
如火生蓮花 世間無有比  
爾時世尊次第乞食將諸比丘還至本處入  
深禪定七日七夜寂然不動彌勒佛弟子色如  
天色普皆端正厭生老病死多聞廣學守護  
法藏行於禪定得離諸欲如鳥出殼爾時釋  
提桓因與欲界諸天子歡喜踊躍復說偈言  
世間所歸大導師 慧眼明淨見十方  
智力功德勝諸天 名義具足福眾生  
願為我等群萌類 將諸弟子詣彼山  
供養無惱釋迦師 頭陀第一大弟子  
我等應得見過佛 所著袈裟聞遺法  
懺悔前身濁惡劫 不善惡業得清淨  
爾時彌勒佛與娑婆世界前身剛強眾生及

①末(●)未(⊕)下同 ②具(●)且(⊕)

諸大弟子俱往耆闍崛山。到山下已。安詳徐步登狼跡山。到山頂已。舉足大指躡於山根。是時大地十八相動。既至山頂。彌勒以手兩向擘山。如轉輪王開大城門。爾時梵王持天香油灌摩訶迦葉頂。油灌身已。擊大捷椎。吹大法蠡。摩訶迦葉即從滅盡定覺。齊整衣服。偏袒右肩。右膝著地。長跪合掌。持釋迦牟尼佛僧伽梨授與彌勒。而作是言。大師釋迦牟尼多陀阿伽度阿羅訶三藐三佛陀。臨涅槃時。以此法衣付囑於我。今奉世尊。時諸大眾各白佛言。云何今日此山頂上有人頭蟲。短小醜陋。著沙門服。而能禮拜恭敬世尊。時彌勒佛訶諸大弟子。莫輕此人。而說偈言。

孔雀有好色 鷹鷄鷄所食 白象無量力  
獅子子雖小 撮食如塵土 大龍身無量  
金翅鳥所搏 人身雖長大 肥白端正好  
七寶瓶盛糞 污穢不可堪 此人雖短小  
智慧如練金 煩惱習久盡 生死苦無餘  
護法故住此 常行頭陀事 天人中最勝  
苦行無與等 牟尼兩足尊 遣來至我所  
汝等當一心 合掌恭敬禮

說是偈已。告諸比丘。釋迦牟尼世尊。於五濁惡世教化眾生。千二百五十弟子中。頭陀第一。身體金色。捨金色。婦出家學道。晝夜精進。如救頭然。慈愍貧苦。下賤眾生。恒福度之。為法住世。摩訶迦葉者。此人也是。說此語已。一切大眾悉為作禮。

爾時彌勒持釋迦牟尼佛僧伽梨。覆右手。不遍纒掩兩指。復覆左手。亦掩兩指。諸人怪歎。

先佛卑小。皆由眾生貪濁。憍慢之所致耳。告摩訶迦葉言。汝可現神足。并說過去佛所有經法。爾時摩訶迦葉踊身虛空。作十八變。或現大身。滿虛空中。大復現小。如葶藶子。小復現大。身上出水。身下出火。履地如水。履水如地。坐臥空中。身不陷墜。東踊西沒。西踊東沒。南踊北沒。北踊南沒。邊踊中沒。中踊邊沒。上踊下沒。下踊上沒。於虛空中。化作琉璃窟。承佛神力。以梵音聲說釋迦牟尼佛十二部經。大眾聞已。怪未曾有。八十億人。遠塵離垢。於諸法中。不受諸法。得阿羅漢。無數天人。發菩提心。繞佛三匝。還從空下。為佛作禮。說有為法。皆悉無常。辭佛而退。還耆闍崛山本所住處。身上出火。入般涅槃。收身舍利山頂起塔。彌勒佛歎言。大迦葉比丘。是釋迦牟尼佛。於大眾中。常所讚歎。頭陀第一。通達禪定。解脫三昧。是人雖有大神力。而無高心。能令眾生得大歡喜。常愍下賤。貧苦眾生。彌勒佛歎大迦葉骨身言。善哉大神德。釋師子大弟子。大迦葉。於彼惡世。能修其心。爾時摩訶迦葉骨身即說偈言。

頭陀是寶藏 持戒為甘露 能行頭陀者  
必至不死地 持戒得生天 及與涅槃樂  
說此偈已。如琉璃水。還入塔中。

爾時說法之處。廣八十由旬。長百由旬。其中人眾若坐若立。若近若遠。各見佛在其前。獨為說法。彌勒佛住世六萬億歲。憐愍眾生。故令得法眼。滅度之後。諸天世人。闍維佛身。時轉輪王收取舍利。於四天下。各起八萬四千塔。正法住世六萬歲。像法二萬歲。汝等宜應

勤加精進。發清淨心。起諸善業。得見世間燈明。彌勒佛身必無疑也。佛說語已。尊者舍利弗尊者阿難。即從座起。為佛作禮。胡跪合掌。白佛言。世尊。當何名斯經。云何奉持之。佛告阿難。汝好憶持。普為天人。分別演說。莫作最後斷法人耶。此法之要。名一切眾生斷五逆。種淨除業障。報障煩惱。修習慈心。與彌勒共行。如是受持。亦名一切眾生得聞彌勒佛名。必免五濁世。不墮惡道經。如是受持。亦名破惡口業心。如蓮花定見彌勒佛經。如是受持。亦名慈心不殺不食肉經。如是受持。亦名釋迦牟尼佛以衣為信經。如是受持。亦名若有聞佛名。決定得免八難經。如是受持。亦名彌勒成佛經。如是受持。佛告舍利弗。佛滅度後。比丘比丘尼。優婆塞。優婆夷。天龍八部鬼神等。得聞此經。受持讀誦。禮拜供養。恭敬法師。破一切業障。報障煩惱。得見彌勒及賢劫千佛。三種菩提。隨願成就。不受女人身。正見出家。得大解脫。說是語已。時諸大眾聞佛所說。皆大歡喜。禮佛而退。

佛說彌勒來時經

失譯人名附東晉錄

No. 457

舍利弗者是佛第一弟子。以慈心念天下。往到佛所。前長跪叉手問言。佛常言。佛去後。當有彌勒來。願欲從佛聞之。佛言。彌勒佛欲來出時。閻浮利內地。山樹草木。皆焦盡。於今閻

文殊師利問菩薩經

No. 458

後漢月氏三藏支婁迦讖譯

浮利地周匝六十萬里，彌勒出時閻浮利地東西長四十萬里，南北廣三十二萬里，地皆當生五種果，四海外無山陵，巖谷地平如砥，樹木皆長大，當是時人民少貪，姪瞋，患愚癡者，人民眾多，聚落家居，鷄鳴展轉相聞，人民皆壽八萬四千歲，女人五百歲，乃行嫁，人民無病痛者，盡天下人有三病，一者意欲有所得，二者飢渴，三者年老，人民面目皆桃花色，人民皆敬重，有城名鷄頭末，鷄頭末城者，當王國治，城周匝四百八十里，以土築城，復以板著城，復以金銀琉璃水精珍寶著城，四面各十二門，門皆刻鏤，復以金銀琉璃水精珍寶著之，國王名僧羅，四海內皆屬僧羅，行即飛行，所可行處，人民鬼神皆傾側，城有四寶，一者金，有龍守之，龍名倪蟄，主護金，龍所居山地名犍陀，二者銀，其國中復有守龍名幡頭，三者明月珠，所生地處名須漸，守珍龍名賓竭，四者琉璃，所生城名汜羅那夷，有一婆羅門名須凡，當為彌勒作父，彌勒母名摩訶越題，彌勒當為作子，彌勒者種當作婆羅門，身有三十二相八十種好，身長十六丈，彌勒生墮城地，目徹視萬里內，頭中日光照四千里，彌勒得道為佛時，於龍華樹下坐，樹高四千里，廣亦四千里，彌勒得佛時，有八萬四千婆羅門，皆往到彌勒所師事之，則棄家作沙門，彌勒到樹下坐，用四月八日明星出時，得佛道，國王僧羅聞彌勒得佛，則將八十四王，皆棄國捐王，以國付太子，共到彌勒佛所，皆除鬚髮為沙門，復有千八百婆羅門，皆到彌

勒佛所作沙門，彌勒父母亦在其中，復有聖婆羅門千八十四人，皆復到彌勒佛所作沙門，國有大豪賢者名須檀，人呼須達，復呼人民，以黃金持與彌勒佛及諸沙門，名聲日布，方遠，須達復將賢善人萬四千人到彌勒佛所作沙門，復有兄弟一人，兄名鼓達，弟名扶蘭，兄弟皆言，我曹何為是世間，寧可俱到佛所，求作沙門耶，兄弟皆言，我善，便到彌勒佛所作沙門，復有小女人輩八萬四千人，身皆著好衣，白珠金銀瓔珞，俱到彌勒佛所，皆脫著身珍寶，以著地，白佛言，我曹欲持是上佛及諸沙門，我欲從佛作比丘尼，佛即令作比丘尼，彌勒佛坐為諸比丘僧比丘尼說，皆是釋迦文佛時，誦經者，慈心者，布施者，不瞋恚者，作佛圖寺者，持佛骨著塔中者，燒香者，然燈者，懸繒者，散花者，讀經者，是諸比丘尼皆釋迦文佛時人，持戒者，至誠者，於今皆來會，是聞諸比丘所說經處者，皆於龍華樹下得道，彌勒佛初一會說經時，有九十六億人，皆得阿羅漢道，第二會說經時，有九十四億比丘，皆得阿羅漢，第三會說經，九十二億沙門，皆得阿羅漢，舉天上諸天，皆當持花散彌勒身上，彌勒佛當將諸阿羅漢，至雞頭末王所治城，王皆內宮中飯食，舉城皆明，夜時如晝日，彌勒於宮中坐說經，言善不可不作，道不可不學，經不可不讀，佛說經已，諸比丘及王百官，皆當奉行佛經戒，皆得度世，佛說如是，彌勒佛却後六十億殘六十萬歲，當來下，佛說彌勒來時經

舍利弗前長跪白佛，願欲有所問，唯佛肯者，乃敢問，佛言，善哉善哉，舍利弗當問，汝若從文殊尸利，但聞怛薩阿竭，署因緣法名未悉，得其事，今為汝說之，諦聽諦聽，舍利弗言，受教及摩訶目犍連，摩訶迦葉，摩訶迦旃延，摩訶拘絺那利文，陀弗，須菩提，阿難律，朱利，敢摩訶敢，奈吒和羅，阿難，一一尊羅漢，悉在會中，皆起為佛作禮，白佛，願樂欲聞，令菩薩悉當因緣摩訶僧那僧涅，若男子若女人聞者，皆當求之，諸聲聞者，皆當因其法，所以求僧那僧涅者，欲令一切其當脫者，悉得羅漢，諸一一尊比丘，以華散佛上，供養怛薩阿竭，署諸欲天子，悉以天華飛行供養，以天伎樂以樂之，所以者何，從本所不聞其字，何況今當具足聞之，釋提桓因，以天上拘耆華樹而化，滿其祇洹，佛語舍利弗，怛薩阿竭，署者，有四事，何謂四事，一者發意，二者阿惟越致，三者菩薩坐於樹下，四者具足佛法，是為四，舍利弗問，何因緣發意菩薩有一署，所謂發意所作，為一切十方作功德，所以者何，欲令皆得僧那僧涅，故名曰一署，阿惟越致署者，一切有所作為，無所希望，求是地安隱地，無所想地，堅固地，是為佛法基界，故曰為二署，坐於樹下者，由不空起，起者當成道，故不離力，無所畏，是為三署，怛薩阿竭署者，如所署審如所署，署不可數，特尊之署，已住怛薩阿竭阿

①善能 ◎ 宣 語 正 誦 ②讀能 ◎ 宣 讚 正 誦 ③連能 ◎ 宣 蘭 正 誦 ④僧那為弘誓，大誓，僧涅為自誓，皆謂菩薩之四弘誓，即自誓四弘誓謂之僧那僧涅，或言~

羅呵三耶三佛陀。已法教是為四署。佛語舍利弗。菩薩復有二署。何謂二。為聲聞轉法輪。為阿惟越致轉法輪。是為二署。怛薩阿竭署。名署已在中者。已法有教。色法佛法痛痒思想生死識法佛法。其法者。舍利弗。不可議。譬如愚人所作。言是法可得。是法不可得。

佛語舍利弗。不可得者不教捨本空者。諸法教故。名曰怛薩阿竭署。舍利弗言。何所是怛薩阿竭署。佛言。不可勝數。是為署。佛問舍利弗。何所慧是署。舍利弗言。怛薩阿竭不以法取法。法者不可得故。是曰為慧署。是菩薩所當學。學者當學怛薩阿竭署。不念以過去世俗法以應道法。不說俗事之惡。不言道事可好。如是學者為學怛薩阿竭署。不以識學是非。非不作是學。為怛薩阿竭署。不分別大。大者謂眼色識。不分別眼分別一切。有念是為不學。怛薩阿竭署。是人可度。是人不可度。作是學。為不學。怛薩阿竭署。怛薩阿竭署者。則一切人之署。作是學者為學。怛薩阿竭署。學怛薩阿竭署。無央數署。一切法無所斷絕。是為學。怛薩阿竭署。佛語舍利弗。不念諸法當有所生。於怛薩阿竭署無所想。是為學。怛薩阿竭署。不念是所有無所有。佛語舍利弗。其欲學。怛薩阿竭署者。不想。怛薩阿竭。為學。怛薩阿竭署。諸法無所求。是為署。是則。怛薩阿竭署。佛語舍利弗。色法佛法。痛痒思想生死識法。怛薩阿竭法。諸法無所著。隨署教一切諸法不著已。不念有無。是則隨教。已不著有無則隨無根之教。如是學。為學。怛薩阿竭署。

署者。亦無過去當來今現在。如是署者。見一切亦不見一切。舍利弗。白佛言。何謂為見。無所覆無所蔽。悉見。是為怛薩阿竭署。何謂為不見一切。所謂不見其門無所入。是故不見。是為怛薩阿竭署。亦不於署與空合。并。亦不思想。亦不願。亦不可見。亦不可得。如寂者。則其署清淨。署無能得長短。署亦無有助。署者不可得助。署者亦無有異。是為署。無所從生。署。是謂。怛薩阿竭署。亦不足計。亦不踝計。亦不膝計。亦不臍計。亦不腹計。亦不臂計。亦不手計。亦不頤計。亦不頭計。亦不內計。亦不外計。亦不中間計。亦無不極計。亦不無極計。亦不上下四維。東西南北計。亦不人計。亦不須陀洹計。亦不羅漢計。亦不辟支佛計。亦不怛薩阿竭計。亦不有餘無餘計。亦不脫有脫計。亦不計法所在。不可計署。無有字署。是則。怛薩阿竭署。佛語舍利弗。今會者比丘多有。不聞是者。未聞計言。有是無有。是。如我身諸法。悉爾。作是語者。便隨其語。作行不可計。而為作計。為法處者。因是有取與。便有命持思。想壽欲壽壽。欲得壽欲壽壽。已欲壽壽壽。佛語舍利弗。署亦不從法。亦不從非法。亦不從有亦不從無。當作是從。不可說。怛薩阿竭從亦不從。怛薩阿竭者。亦不壞敗。亦不想覺。是為怛薩阿竭。覺不可聞。是故。審聞如是說。則。怛薩阿竭說。諸所說。審說如空說。審佛語舍利弗。無所從來。是為。怛薩阿竭。來無有處。是為。怛薩阿竭。處無所依。是為。怛薩阿竭。依無所屈。無所申。如。怛薩阿竭。不可得。諸

法亦不可得。心無所生。無所安住。諸所作功德。無所求。如所教。無所行。是為行。是種。無所生。是功德。亦無根。亦無實。僧那者。無所縛。無有脫。無所作。是為精進。無所觀。亦不作是視。所見者。不作二心。智無所得。其智無所為。亦無所起。不以證而作求。作是求。作是念。無有名。其語。政者。謂不可得。其哀若道。其得等者。無人不念人。其護者。不作是念。念作不念。佛語舍利弗。無慧是則慧。十二因緣。無所生。其合者。無有合。不可得道。可得無所念。是比丘念。無所持。而持鉢被服。無所剃。是為剃頭。無所受戒。而持戒。而無如是。比丘好道。所好。是比丘所好。用意定者。無有異意。其已定者。無有身心念。不念慧者。是比丘數。其說已足者。以不足。若比丘足者。謂為少。不可計法。而言可知。已無有知。已不從是法者。如所教。無有界。是故。佛界無有法。是故。怛薩阿竭法。無作法。法無所作。故曰。無有法。諸法所入。悉當盡。是為。怛薩阿竭署。無所入。已應。怛薩阿竭署。佛語舍利弗。若有欲學。怛薩阿竭署者。其有勇猛。如師子者。若男子。若女人。當作清淨戒。無有異意。心清淨。清淨慧之所作。無所念之所作。其飲食取足而已。若乞。乞諸所。思想。已清淨。無有異心。不於一切人。而有想。不於諸法。有所希望。亦不念下中上之事。所作常等。比丘作是學者。已為學。佛語舍利弗。其無所求。學者。為學。怛薩阿竭署。摩訶迦葉。白佛。比丘以一事。學僧那。僧涅已。為學。怛薩阿竭署。何謂一事。諸法無所著。是為學。怛薩阿

竭署。須菩提。白佛。比丘以二事學。何謂二事。於諸法無所希望。為以等心一切人。不念以等一切。是為二。比丘學。恒薩阿竭署。摩呵目捷連。白佛。比丘以三事學。何謂三事。但學要法。不學飾。亦不念我以近。亦不念我以遠。是為三事。文陀。弗。白佛言。比丘以四事學。何謂四事。不念有所從得。亦不念何所當得。一切如等淨。所持若空。是為四事。如是學。為學。恒薩阿竭署。摩訶迦旃延。白佛。比丘以五事學。何謂五事。無所貪惜。欲以法祠祀。為一切有慈。不念一切有慈。不念一切於諸法作無所求。是為五事。為學。恒薩阿竭署。奈吒和羅。白佛。比丘以六事學。何謂六。不發一意。亦不求空。亦不學本際。所以者何。不因緣二事。已向佛所。脫不起念。思惟。何所是佛證。是為六事。比丘學。恒薩阿竭署。佛言。一切法。一切人。悉以恒薩阿竭署見。亦不異見。亦復不見自然。亦不見法。作是學。為學。恒薩阿竭署。奈吒和羅。復聽。比丘所學。無極署。是乃應。恒薩阿竭署。如所樂。不見其樂。如是行者。比丘為學。恒薩阿竭署。學。恒薩阿竭署者。以為學佛法。不可議法。用一切故。奈吒和羅。白佛。若比丘學。恒薩阿竭署者。云何而自持。佛言。比丘意。不念有一切人。不念有一切法。亦不安。亦不危。是為比丘。而自持。奈吒和羅。白佛言。今恒薩阿竭。為誰說。恒薩阿竭署。佛言。其欲學如署者。為是說。何所是學者。佛言。用摩訶僧那。僧涅。故說。亦不念。是彼中間。一切無有求。是為恒薩阿竭署。其有想行者。是故非署。如是者。為

自貢高而賤他人。其慳貪嫉妬。不應是署。其有諛諂不慚愧者。妄語者。皆不應是署。其有不愛樂眾者。其欲獨有者。若樂惡者。不喜人安隱者。其有所念。呼為有。其有二心者。謂好惡。無有異作思想者。離深法者。念不中事者。求利害者。若求乞。瓦鉢。震越床。臥具。病瘦。醫藥。若欲求飲食。離於迦羅蜜。親附於惡師。於本佛所。無功德者。常有怖懼。於本際。欲於世事。轉相克識。所作但求名字。而無至者。愛樂於五所欲。有所作。希望得者。所以如是者。不能在。山間。空閑。寂靜。有慈心之意。離於哀心。常在魔事。離信佛戒者。所作悉不隨其法教。常喜亂心。不安隱心。其心狂亂。其心多端。用是故。離於好心。離於微妙之心。離於盡心。但念佛色身。但念欲見法。但欲見比丘僧。離五陰功德。離四大功德。離六衰功德。離十二因緣功德。離念一切人之功德。其有是心者。悉不應。恒薩阿竭署。其有不諛諂。常質朴。念諸深法。佛語。奈吒和羅。其有心如是者。已應。恒薩阿竭署。其有歎歌佛者。已有念一切佛。故欲學。恒薩阿竭署。故。其有學者。不學者。恒薩阿竭。悉知。觀視佛意者。若在城郭。丘聚。縣邑。有所見。恒薩阿竭署。悉見之。佛語。奈吒和羅。若能知。恒薩阿竭署。不。奈吒和羅言。當從佛聞。當從佛聽。何能身自知之。唯佛說之。願樂欲聞。以比丘當持。佛言。善哉。善哉。如奈吒和羅所說。佛言。其餘。凡意者。不能知。恒薩阿竭署。而不作。恒薩阿竭道地者。而不能知。恒薩阿竭署。不可盡極數。是故名曰署。不可觀視。

不可觀視。是故名恒薩阿竭署。其欲知。恒薩阿竭署者。以不愛惜身壽命一切。等心於一切人。一切諸虛飾之事。不在其中。其有二心者。不與共同。其欲學。恒薩阿竭署者。當作是學。奈吒和羅。白佛。於是會中。乃有學。恒薩阿竭署者。不。曰。文殊尸利。菩薩耶。佛復語。奈吒和羅。譬如。人到大海。名珍寶。摩尼處。其價不可計數。其人於珍寶中住。而不知。摩尼珠。價。若有一人。謂其住寶中者。今在是中。寧知摩尼處不。其人反言。不曉。所以者何。其人不知。摩尼珠。故。今。奈吒和羅。在名寶中。而不知寶處。所以者何。在眾摩訶衍中。而不知。復有比丘名。闍炎。闍焰。白佛。若無學。僧那者。我欲等心。以光明。照於一切。復有比丘名。三。波。謔。師。利。白佛。我欲學。恒薩阿竭署。所以者何。一切諸法。我無所求。復有比丘名。三。摩。師。利。我欲學。恒薩阿竭署。我不欲於諸法。有二心。所以者何。了無所見。故作是學。乃可為學。恒薩阿竭署。佛言。而所學署。當作是學。復有比丘名。曰。染。師。利。白佛。我不以一切人為他人。亦不於人有所思想。欲度人。亦不見。當所度者。亦不見法。當以何法教。欲作是學。恒薩阿竭署。佛言。如所學署。當學。復有比丘名。曰。勃。白。佛。我以忍於一切。亦無有貢高。所以者何。他人自貢高。我不以身自貢高。我不以所有。想。有。若以內自貢高。我不以內自貢高。所以者何。用念一切人。故。念一切。欲令安隱。我亦不以惡住。以法明。故。住念一切。悉欲令明。不欲令有冥。我作是學。恒薩阿竭署。佛言。當學。而所

①弗 ②脫 ③奈 ④賴 ⑤奈 ⑥闍炎 ⑦闍焰 ⑧闍焰 ⑨闍炎 ⑩闍炎

學復有奢夷種名曰多和光白佛言我欲教一切人過於生死亦不得生死而可度者欲作是學怛薩阿竭署佛言當學署如所學

復有比丘名曰惟闍耆橋沙白佛我欲如佛在佛樹下亦不見佛樹亦不得欲作是學怛薩阿竭署如所學復有比丘名坻羅末白佛我不學諸法我亦不學欲所法是所有法悉不學諸法法而不學佛言如所言怛薩阿竭署用一切故欲學應時於坐中有萬比丘尼三千人皆起白佛吾等欲學怛薩阿竭署用一切故欲具足學復有七千優婆塞優婆夷五千人皆從坐起言吾等當具學爾時復有八萬天子悉言當具足學教告一切復有比丘名私呵難白佛諸法無所得諸法不可得當云何學怛薩阿竭署佛言如若所學署當學復有比丘名利三匄白佛我不轉於一切法當云何學怛薩阿竭署佛言如所學署當學復有比丘名摩呵波那陀惟嶮王者種白佛亦不無我亦不有我亦不智亦不無智亦無所破壞亦無有證是意無有異諸所因緣無所因作是為學怛薩阿竭署佛言如所學署當學復有比丘奢夷種名曰非陀遍白佛一切諸法不見際無有際者謂若有若無有亦無際亦無無有亦無字其如是者乃可忍佛言不可若無際無際已無願無願者是故菩薩佛言善哉善哉如仁之所說無願不可議不可知不可思想不可住無所畏無有字平等無所學無所持無所壞無所造無所作其知一切無所得無有色菩薩亦無名色亦

自是非是學非者亦不可得無所罣礙佛言如所學署當學爾時有五百婆羅門出舍衛國因道徑到佛所前為佛作禮而却住白佛言如所說願樂欲聞令常安隱佛問諸婆羅門用誰故欲聽聞諸婆羅門言無有人是故人用是故佛言有怛薩阿竭署從本諸佛所說今我所語是有婆羅門名羞桓師利白佛在於母腹中以聞怛薩阿竭署復有婆羅門名三摩震謔白佛言適向母胞胎已聞怛薩阿竭署復有婆羅門名雪真提白佛言適生便聞怛薩阿竭署四面而明見怛薩阿竭飛在上住以手著我頭便言若當號為不可見頂佛復有婆羅門名頗真提白佛生以來不久便聞怛薩阿竭署於空中見佛來而言若當聞學怛薩阿竭署復有婆羅門名曰那羅沙目竭白佛今夜半見四面四佛來到我所便以頭面作禮諸佛言有不可議怛薩阿竭署於祇洹釋迦文佛所聽受是我本之瑞應復有婆羅門名阿真提羅蕪耶白佛今夜半見佛長高二十里三十二相諸種好謂我當學怛薩阿竭署聞之忽然而不復見我本之瑞應復有婆羅門名三波奢白佛我生墮地時有人而來舉舍而明謂我母勿以乳子令是子當以怛薩阿竭署而為飲食母聞之歡喜是我本之瑞應復有婆羅門名倪三颺白佛言我本學婆羅門事時於空中見佛有三十二相諸種好便舉言若當學若當事聞之則以頭面著地問何所是學何所是事其佛言有怛薩阿竭署是若學是若事如學是者

諸法悉可知是則為度是則怛薩阿竭事是故俗浴者謂去垢不可議浴是菩薩浴所謂諸法悉在前脫不脫者欲於眾婆羅門中而尊當學是署我聞其言踊躍歡喜以頭腦受其教問佛何以故前有是瑞佛言是怛薩阿竭署之瑞應復有婆羅門名摩呵迦婁那白佛我行洗浴還作大火欲祠之於上見佛身有三十二相諸種好其佛言如若祠火之法不當爾所以者何起復而滅故我即時復問不作是滅當何以滅之其佛言不念人不念我不念壽命不念有無有亦不念合亦不念中分亦不念思想是火而無滅者而自滅其火可令自然而不用薪我諦聞之即叉手問佛當云何作火而不用薪其佛言有不可議怛薩阿竭署若當學學已便能作火而不用薪作是學者亦不念姪怒癡以故火即為滅聞之即以頭腦受其教所見者是我本之瑞應佛言如若所說怛薩阿竭之瑞應復有婆羅門名牟梨師利白佛我適提酪欲著火中欲令之熾盛便見怛薩阿竭身有三十二相諸種好即時其佛言用是火為事有怛薩阿竭署何以不學應時問其佛當何所學往到祇洹釋迦文佛所是我本之瑞應復有婆羅門名曰分眇者橋泉白佛我到廬上取華欲持歸見怛薩阿竭身三十二相諸種好其佛言取花不如若如取花取花有所壞敗我應時復問取華云何其佛言莫以手取莫動搖其枝而可得取當學怛薩阿竭署自如有慧手為若取其華慧手者可得不可議花一

切人皆是華。可以教化得泥洹。是之瑞應。佛言。當學怛薩阿竭。若所學復有婆羅門名曰那陀施。白佛。我到市。於道中央失墮錢。散在地。以聚欲取。訖以仰頭上視。怛薩阿竭身有三十二相。諸種好。問我作何等。我言。捨地所失錢。其佛言。是不為難。若當捨五道生死一切人。亦不那中作數。亦不想。是乃為難。即問。是學當所從聞。當所從學。其佛言。有怛薩阿竭。當學。當那所聞。即時言。有佛名釋迦文。在祇洹。當從是聞。前世所作。今世逮得。是本瑞應。復有婆羅門名曰分訶舟。白佛。到市向歸。欲買雜香。買以還歸。未到舍。見怛薩阿竭。其心即時踊躍。佛問。手中持何等。即謂持雜香。佛言。是香不足言。有香名為不可議香。其香聞上下四維。東西南北方。當求是香。應時復問。是香者是根。是本。是莖。是枝。是葉。是華。是實。實之所香。佛言。是香者亦無根。亦無本。無莖。無枝。無葉。無華。無實。實而香。當求是香。即問。當於何所求。即言。於祇洹。釋迦文佛所。當聞怛薩阿竭。是我所聞之瑞應。佛言。如所聞。復有婆羅門名曰阿耨迦。惟延。白佛。我所至城外。坐於樹下。其心安定。譬若如禪。視四面如普大明。見無央數佛。悉言。不當坐禪。如是。應時即問。其佛。其佛言。亦無所生。無所滅。是為應禪。所以持所視。故無所視者。是為視。無心何以繫者。何以故。其心無有想。故當作是禪。有法名怛薩阿竭。當從釋迦文佛所問。當從是學。其法。是故本瑞應。佛言。當學如所學。復有婆羅門名曰羅那懿。多。白佛。

適到市買金。欲以稱稱之。便見怛薩阿竭。其光明甚明。其佛言。用是稱為。有法名不可稱。當如求之。則時復問。何所是不可稱者。其佛言。諸法不可以稱。稱之。譬如空不可稱。一切諸法如是。我言。願樂欲聞。何所是法。而可學者。其佛言。有名曰怛薩阿竭。當學。當聞。是我本之瑞應之所問。佛言。當學如所聞。是皆前世功德之所致。故逮是應。復有婆羅門名曰阿披阿遮。叉手白佛。我夜已半出觀星宿。有大明而見怛薩阿竭。便以頭面作禮。其佛言。不見視星宿。如若所視。應時即問。其佛報言。亦不可仰向。佛復還問。今若所視星宿名何等。我即應言。不知。其佛言。是名悉盡。如若所學。當學。諸法所入。悉知所見。汝事。即復問。何所處可聞。是法。其佛言。當於祇洹。釋迦文佛所。聞是語。忽而不知處。是故所聞。怛薩阿竭。署本之瑞應。佛言。當學如所聞。復有婆羅門名曰術闍師利。白佛。適以種農。種。便見怛薩阿竭。在前住。與不可數千比丘。僧俱。其佛言。不當如若已種農。種。應時則問。當云何種。其佛言。亦不取。亦不放。當作種。亦不生。亦不枯。則時復問。佛。當何所處。而學是法。其佛言。有怛薩阿竭。當學。當聞。聞。已。是若之種。亦不取。一切之法。亦無所取。亦無所造。亦不思。想。知是者。其法。無所生。無所造。故無所生。已無所生。故無所枯滅。無有種。而不生。亦不滅。即問。佛。是何等瑞應。佛言。是怛薩阿竭。署之瑞應。其當於佛樹下坐者。是之瑞應。復有婆羅門名曰阿禾真。阿禾真。白佛。出舍於里門。

見死人。便念死人。乃如是。應時獨語。便見佛。佛言。不當如若所念。所以者何。見惡色。便有思想。諸法不可得。而無所得。當作是念。其得道者。所作。不以想。亦不用得。故便有餘念。亦無二心之所念。無所想。是故無有想。是道所作。念。無可所得。是乃為得。以知二心者。是故無所求。是道之所作。無所見。是道所見。後法欲盡時。以思想。教人。若於塚間。見枯白骨。坐念。便得脫。若念五色。從是中。教計。而求脫。教計。出息。入息。欲求脫。知欲法盡。便有作。是應時。復問。佛。當云何學。便離是事。其佛言。當學道如是。法。當學。怛薩阿竭。署。如怛薩阿竭。署。有法名。怛薩阿竭。署。當聞。當學。當從。釋迦文佛。聞。是。忽然不見。所以見。是。佛言。是。怛薩阿竭。署。之。瑞。當。在。道。地。故。復。有。婆。羅。門。名。阿。惟。示。真。白。佛。我。到。曠。野。見。眾。多。死。人。中。有。為。畜。狩。所。食。噉。者。中。有。臭。者。中。有。壞。敗。者。有。青。色。者。有。赤。色。者。有。黧。黧。者。便。自。念。欲。於。坐。教。計。狀。念。是。便。見。東。方。佛。來。有。三。十。二。相。便。遙。向。而。為。作。禮。其。佛。言。雖。觀。是。物。以。為。想。即。時。問。其。佛。我。當。學。何。法。而。教。一。切。令。脫。生。死。其。佛。言。有。法。名。怛。薩。阿。竭。署。當。聞。當。學。學。是。者。為。一。切。諸。道。作。功。德。從。釋。迦。文。佛。具。足。聞。之。是。何。本。瑞。應。佛。言。是。怛。薩。阿。竭。署。之。瑞。應。作。是。學。者。為。學。在。佛。樹。下。坐。復。有。婆。羅。門。名。曰。波。梨。漫。多。白。佛。我。夜。出。竇。無。所。可。見。便。然。五。舍。以。為。燭。火。所。以。者。何。避。溝。坑。深。井。便。自。念。當。學。何。法。而。為。一。切。作。明。令。其。無。冥。這。有。是。念。便。見。佛。在。虛。空。中。住。言。善。哉。善。哉。是。上。人。之。



所作，非凡人之所為。諸怒根貪饕諛諂虛飾，已無是者能念是事，非餘所及。以等心念一切，亦不念數數。所念如佛在樹下，不念聖文。其佛言，有法名怛薩阿竭，當聞當學具足。若意復問佛，當從所聞。其佛言，當從釋迦文佛所聞。其所當聞者，悉在彼聞。若丘聚縣邑城郭郡國，悉於是法中而見聞。是言已，恍惚不知其處。是何瑞應。佛言，用若當聞怛薩阿竭，當學。故是之瑞應。其菩薩所當學，悉在是法。復問佛，有幾署所當可學。佛言，如佛境界，其署如是。其署者，如佛境界等無異。諸法皆從是署。如勅心瑞應時，復問我。是法微妙深。乃如是。是不可見，不可知。復有婆羅門名曰悉達，膝白佛，我與數百千婆羅門俱，如行祠祀，熟自念，當何祠祀。令一切皆得解脫，令無勤苦。這作是念，便見怛薩阿竭光明，及相種種好。便言，善哉善哉，乃作是念。當作念，如若所為。其佛言，往到舍衛國，祇洹阿難，那祇阿藍，釋迦文佛所。當為若廣說其祠祀意。有法名怛薩阿竭，當聞當學。是皆以過去諸佛之所說。復問當何以祠祀。佛言，菩薩以飲食所有施與人，作是祠祀，而脫於三界。有識祠，不自念有求，故有忍辱祠。不以心惡向一切。有精進祠，欲拔脫五道。有三昧祠，不作因緣有所希望。有多所聞祠，一切名身諸數。身具足波羅蜜，知有法施祠。若行人欲以法化一切，若有畜生欲聞法者，不中捨而為說。經亦不以色說。以法慈心教詔一切。佛言，有人不惜其身，趣欲令一切各得安隱，不以

憂心而教人。所以者何。用更得好驅，譬如摩尼珠洗之倍好。其王者子莫不愛喜。所以愛喜者何。無瑕穢故。其法師譬如，雖有生有所更倍好。所以者何。身亦無惡，亦無榜者。所以者何。常歌歎佛故。雖佛遠，常欲親近。所以者何。已無所求。即祠是為祀。其有三拔致者，亦有祠而無有異。所以者何。無有恨心。故於一切無惡意。菩薩有祠，無有勝者。若有念是者是故勝。不念之者無所勝。以功德長養身。及他人，是故菩薩意。所以者何。不以法有所諍，以故無鬪。無有繫無有縛，無有閉。其有作是祠者，莫有能瞋者。亦不念何法可計。可校是上人之所作。已處觀其處處，亦不於功德中有所想。亦不破壞所作罪。所以者何。不失其本故。亦無有過。菩薩上之尊法，能來教化者，亦歡喜亦無懈怠。亦不與人如有怒心。所以者何。摩訶衍不從是得。故曰摩訶衍。亦不想其行。佛語悉達，膝捨若本祠祀，當作是祠祀。即菩薩祠祀之瑞應。如若所見怛薩阿竭，是皆先世習行之所致。所以者何。若覺眼見佛者，是皆本之瑞應。復有婆羅門名難頭多。羅。白佛，我見流水。有一人而持一木作橋。我念子之所作甚何小矣。等作可以廣大。所以者何。欲令一切悉可得度過。適有是念。東方便有百佛而來現。悉言，善哉善哉。是上人之所念。令一切人而得度。亦無央數人之路。今釋迦文佛在於祇洹，子往可悉從受法。得致阿耨多羅三耶三菩提。是我本之瑞應。得見怛薩阿竭，聞其教戒。佛言，善哉善哉。如子所

言。復有婆羅門名曰旃鬱多師利。白佛，我出城門外。有迦羅越。謂我如過舍施。若二百萬。便隨其歸。入舍有大高座。令我而坐。燒香供養。具作飲食。已二百萬。為達儼。我應時自念。當何以自作方便。而過達儼。如阿耨多羅三耶三菩。清淨之達儼。可得而異。適作念。便見東方千佛悉飛。如來悉在前往。皆言，善哉善哉。如上人。之所作。為一切人欲作。便往到祇洹。釋迦文佛所。當為若廣說其法。如若得清淨。其達儼。而可以受。受之者。令一切皆可得安隱。所以者何。若三千大千刹土。悉奉行十善。受施。不如菩薩發意。為阿耨多羅三耶三菩。提心而受施。悉過是上。作是語已。恍惚不知其處。佛言，即怛薩阿竭。署之瑞應。所以者何。以先供養十方佛。故逮得是法。復有婆羅門名曰閻符師利。白佛，在山中安心而坐。譬如得禪。於上見五百佛。四面皆香。如天香。皆呼我名言。善哉善哉。如若所求。當作阿耨多羅三耶三菩。悉念一切人。以慈心。故勿以想人。作不可思惟禪。作是禪。勿想。心念一切。皆令安隱。勿念人。想。勿念身。想。其諸佛言。往到祇洹。釋迦文所。當為若具說其法。怛薩阿竭。署。當作是學。學是者在所作為。說是已。而不知諸佛處。是我本之瑞應。佛言，審如若所見。無有異。所以者何。其有當坐於佛樹下者。即有是瑞應。應若已先世供養。七千佛。故復有婆羅門名曰荷沙漫。白佛，我見諸婆羅門。不多不少。於恒水浴。已語我。汝復行浴。身所惡露

眾惡悉當隨水而去。便自思惟。何如而浴身。諸眾惡當隨水去。便自見佛在於虛空中。其佛言。汝何思惟。我應時對曰。諸婆羅門令我浴身。所眾惡悉當隨水去。故坐思惟是事。其佛言。若到祇洹釋迦文所。當為若說現法。諸所眾惡悉當除去。其佛言。有名諸法甚深無有底。其水甚美。於是浴者悉得淨潔。若欲浴者當於中浴。眾邪惡可以消除。浴已諸天人及一切皆得安隱。便以法教化無所不遍。所以者何。諸過去佛悉那中浴。是故現瑞應。佛言。當聞怛薩阿竭署者。是本瑞應。有婆羅門名曰惟耆先。白佛。我齎華持到婆羅門神祠。入門見怛薩阿竭飛在虛空中而住。其佛問我。持是華給何所。即應言。欲以上神。其佛言。有怛薩阿竭號曰天中天。可以華供養上之。所以者何。因是有功德。而到阿耨多羅三耶三菩。便可逮得阿耨多羅禪。即欲以華供養。其華悉化作佛。悉紫磨金色。其光七尺三十二相。種種好悉具。諸佛皆言。其心以堅於功德者。能致是應。即時復問。當作何方便令功德不可勝數。其佛言。若有菩薩見佛者。因是作功德。中有見化佛者。因是作功德。中有見佛者。因是作功德。中若見佛坐起處。因是作功德。中有見佛經行處。因是作功德。中有聞佛者。因是作功德。中有聞上下四維四方。有佛教誡一切。因是作功德。中有佛舍利者。因是作功德。中有老病死而自計。因是作功德。若見郡國縣邑破壞者。若穀貴人民飢餓。而用是自計。因是作功德。所以者何。念前事

故。因是有不可數功德。所謂阿耨多羅三耶三菩提。復有婆羅門名曰沙竭末。白佛。我入海浴。適有是念。便見萬佛。皆言。不當如子之意。欲度海。便自念。其餘有浴者亦在是。聞當有此異。其意欲度海。浴適有是念。便見萬佛。皆言。不當如子之意。欲度而浴。我即時復問。當何浴。其佛言。有道度諸法。可於其中。其作是浴者。已為度也。應時復問。何所而可度。於世間者。報言。佛者已為度。即復問。何所法而可從學。有佛名釋迦文。在祇洹中。當從學問。如若所願悉當具聞。悉為若說之。令若得解。聞是已。忽然不見其處。便問佛言。何所法而可度者。度一切諸法者。波羅蜜是。佛言。汝欲度諸法者。當等心於一切人。所以者何。當念度一切人之生死。譬若度海。當學是事。便得度一切諸法。亦不想法。亦不想無法。作是若後。當為一切說法。佛語沙竭末。菩薩用一事具足諸慧。何謂一事。世惡法欲盡。爾時其欲制其法教導一切。令法而不斷絕。是為一事。具足得諸慧。復有二事。菩薩學是疾。逮得佛。何謂二。不念諸法。是我所非我所。亦不念見一切諸法。自然處。是為二事。復有三事。若善男子。女人奉行是者。疾成至佛。何謂三。以諸法視之。如光明於諸法。亦無多亦無少。不作是念。二已應而一。無有異心。所以者何。諸法不可得故。三是因名佛。是為三事。復有四事。何謂四事。一者總持諸法。二常於怛薩阿竭而作功德。三持心如空。不想一切人。四者若有供養不供養者。其心無異。若男子女

人奉行是法。疾得至佛。是為四事。復有五事。何謂五事。一不於諸界有所念。何謂諸界。眼色耳聲鼻香舌味身細滑。意欲所得。不作是念。二常於佛法而作功德。三若見同菩薩。其心有悅。所以者何。用實大故。四於一切無虛飾之心。所以者何。我當度故。五亦於是中無所想。是為五事。沙竭末白佛。其有奉行是五事者。疾得佛。佛言。當作是學。疾得阿耨多羅三耶三菩。自致成佛。是為度生死之海。以法教於一切。令如怛薩阿竭無所不度。其有至心堅住於菩薩功德者。便逮是瑞應。若有念恐中道取證。佛言。如是法者。勿得憂念。具足怛薩阿竭十種力。一切聞者莫不歡喜。

文殊師利問菩薩署經

佛說文殊悔過經

No. 459

西晉月支國三藏竺法護譯

聞如是一時。佛在羅閱祇耆闍崛山中。與大比丘眾俱。比丘千二百五十。菩薩無央數。一切大聖神通已達。逮得總持。攬十方慧。立三脫門。曉了三世無所罣礙。頒宣三寶救濟三界。開演三乘。使曉本無無上正真。爾時文殊師利菩薩遊羅閱祇耆闍崛山。與諸菩薩不可稱計。諸大弟子。天龍鬼神。乾沓。怨阿須倫。迦留羅真陀羅摩睺勒等眷屬圍遶。而為眾。生廣說經法。開演分別。志三乘學。其來聽者。本學聲聞。尋問文殊四聖諦事。學緣覺者。則已自問十二緣起深奧之事。學大

乘者則從已行，諮問咸受六度無極四等四恩善權方便無極大道，或問神通四無放逸四等心行諸分別辯菩薩之道，三十七品不退轉地超入寂滅，或問土界悔過之處，十地十忍十分別事，十瑞十持十印十三昧定，或有問於不壞諸法，入于一義無從生忍，文殊師利各隨所問而發遣之，可悅其心，令無餘疑，爾時會中有諸新學發意菩薩而來聽受，不能將護罪福之緣，陰蓋所覆而為虛妄狐疑所蔽，習在顛倒無勇猛志，依倚形色抱怯弱心，不能諮啟文殊師利淨除因緣一切罪苦，修學大乘至無上道，時彼會中有一菩薩名曰如來齊光照耀，見諸新學菩薩心念，志懷猶豫不能自決，則前白問文殊師利，無罪之事悔過之義，無失勸助諮請無過不違誘進，文殊師利即答如來齊光照耀菩薩，是族姓子，菩薩大士欲除罪業，奉行平等入於過去當來現在佛法，五體投地尋復起立，右膝著地，口自說言，一切眾生從於左路著於左道，其在邪見悉當立之於賢聖法，欲化一切眾生之類，皆至無上真正平等之道，以是之故，右膝著地當宣此言，猶若如來至真等正覺，詣於道場坐尊樹時，蠲除一切眾惡之法，諸善普備，吾亦如之，觀首遍體以手摩之，重以右手而指于地，吾當降魔并及官屬，若得佛道令一切人眾生之類，消伏魔事及外怨敵，坐佛樹下指地要誓，成佛聖慧，如本世尊右手指地降十八億諸魔官屬，以是之故，所以右掌而案著地，以當左手案著於地，又跪

左膝口說此言，假使有人住愚癡法，所受顛倒而不順義，慳悞難化不成好器，慳貪垢穢而處危害，訾毀同學，今者識道改往修來，而皆諦受於四恩行，是以左手及與左膝著於地矣，假使頭腦著於地時，口演此言，使一切人棄除貢高自大之心，孝順父母奉敬尊長，若干種養，當以逮得無能見頂，佛之髻相越度一切世間諸法，身過三界慧踰虛空，今吾自歸，以是五體投地禮德，使諸眾生至成大道，世俗之人生長五蓋，以此功德自然棄除五蓋之蔽，具足五根究竟五力，絕滅五欲逮得五通，遠離五陰成就五眼，其在五趣眾生之類，獲致殊特，五法之行禁戒差特，三昧智慧修於解脫度知見事，以是五體投地之德，陰蓋以消，住根力者常念如來未曾捨懷，復說此言，諸佛世尊唯垂恩慈而見愍念，於是

一切十方世界所有菩薩，上至諸佛慧無罣礙，其行不二，於是平等將護法相，以法身體清淨之言，無有解說，鮮潔之心而無有心，一切諸法慧無陰蔽無來無去，於一切智悉愍普見，等入如來證明要義，過去當來今現在法，識知罪福因緣之報，諸佛世尊乃為聖眼，其慧成就悉能證明，為人重任備精進已，吾從本際至於生死，於真諦際而自迷惑，不能敏達無所識知，處在非法興於法想，違犯政律以為律想，非是眾祐為眾祐想，興發不善以為善想，心隨顛倒不了無常，苦空非身自貪見身，諸惡罪業所為非法，不順典約佛所禁限，自犯此罪若教他人，方當所作罪蓋塵勞，不聽聞法，憎惡菩薩聖眾之業，不奉道教，見諸魔事，遠波羅蜜諸度無極，若人布施抑令不為，壞人德本使不成就，吾今皆從十方諸佛世尊光耀，悔過自首不敢覆蔽，令除其殃，改往修來，從今已後不敢復犯，勿復令我

有眾罪蓋墮於地獄餓鬼畜生鬼神貧窮，若在人中莫令乏匱，設在天上勿為貧夭，博達眾經莫貧於道，財業豐饒莫使厄匱，用七法財以給少智，眼耳鼻口身意陰蓋，斯侵親屬心壞因緣，若生邊地，家室鬪諍而相別離，臭惡瑕穢而不可忍，莫與如此眷屬共會，常使應行正士俱會而與相見，今從十方諸佛悔過，改往修來不敢藏匿。

文殊師利言，當復自責，我前世時行不清淨，毀身口意，姪怒愚癡，與心為害，放弛諛諂，多求無厭，積累惡業，誹謗輕調，毀佛法眾，不孝父母，蔑於尊長，眾祐凡人，瞋其功勳，不能自覺，輕智慢聖，自欺其身，求他長短，既身自犯，又勸他人，其順行者，教令越法，不知佛時，不知法時，不知僧時，不知善惡時，深沒貪姪瞋，恚所沮，愚癡所蔽，不能精進，嫉妬不實，兇暴難化，多所志慕，計任吾我，處人壽命，興五趣念，乞求合集，懷諛諂想，積累無限非法之行，自計有身念是我所，無常為常，想苦為樂，想無身為身，想不淨為淨，想墮四顛倒種於惡業，醉於形色，迷於財業，惑於傲貴，荒於國位，亂於眷屬，所作過罪，見覩諸佛，聞所說法，不肯諮受，不供聖眾，離於德本，捨度無極而忘道心，違失三寶，若復棄捐無盡正業無量功

德及不可盡聖慧辯才所欲自恣從惡知識遠於善友從十方佛自首悔過改往修來不敢藏匿文殊師利復曰當自悔言我前世時志於下劣所遊土地而興誓願毀譽大乘遏斷正教勤從邪徑誹謗正法佛所頒宣深妙之典若干種教抑制法輪使不通流若身自

反倚求色相莊嚴八十種好雖奉事佛不能入於法界無所壞法亦不曉了無所住法而住諸法想法若干設聞經法若講說者思惟所趣而不分別無為之法計於聖眾而有數想供養眾聖亦起悵望皆從十方世光悔過改往修來不敢隱匿

諸法無罪蓋者乃為名曰悔一切過是族姓子菩薩大士往古結縛一切所行眾念妄想財業因緣所受依倚而住處所皆當悔過若使於中如此色像所受思想行不平等當令明了一切無本假使一切無所行者乃能得入於斯本際無想之際無形想際無有二際無陰蓋際無所得際無身之際離欲之際無所習際無所行際無罣礙際無所歸際無所由際是則名曰菩薩大士自首悔過無有罪害得至佛慧滅除一切休息殃覺罣礙之蓋

犯設教他人勸助非法破壞塔寺敗亂聖眾散縣聚落毀大國土若危城邑謀圖帝主害於種姓內外親屬若復傷殘他人身體令生瘡癩危其命根閉於牢獄若教人殺其心迷荒常懷狐疑教人猶豫說他罪殃使不順戒處於邪見從異道教反其正行自懷怨心亂他人意令必瞋恚所作過罪若身自犯及教他人皆從十方自首悔過佛世光明唯蒙見濟改往修來不敢藏匿文殊師利曰當復悔過言我身計有吾我言是我所見顛倒住於貪婬心者無本而想有心不能明了心如幻化也其本自然不能分別諸佛之法發於無上正真道意而欲覩見道之處所一切諸法悉無所有而反言有其身口心所作善惡皆從十方諸世光曜自首悔過改往修來不敢藏匿吾往本時所行布施持戒忍辱精進一心智慧不解三昧住顛倒見若布施者妄想求報心念所取護於禁戒想我他人修於忍辱心倚著身奉持精進住于眾想興發禪定念應不應而想有人樂于放逸貪求智慧志慕歸道謂有處所皆從十方世光悔過改往修來不敢藏匿

吾往古時希望諸法求空處所遊於閑居限節知足少欲為德不能識知一切法空心無所著爾乃可謂靜處燕坐住於法界不能解達法界無受及眾生界亦無所受及依吾我立僻沈沒不能行道而計有人不修四恩當救眾生亦不能濟亦不曉了佛道自然相亦自然於三十七道品之法見有吾趣而倚求望不知寂然沙門之義出家所修奉受具戒依比丘行如是及餘所造德本因其德本獲致安隱有為之福與無為安超絕迥遠不與道合皆從十方世光悔過改往修來不敢藏匿如過去佛諸天中天本為菩薩奉行道時皆悔諸罪罣礙陰蓋吾亦若茲當來現在諸佛世尊本所修改我今悔過亦當如是向尊自首歸命於佛為上為長最勝殊特無上之德為無等倫諸佛聖慧巍巍無量悉知一切世界所有眾塵諸數而得自在普能曉了眾生心念吾等之身從無央數阿僧祇劫所行迷惑而自放逸悔一切罪陰蓋之患如為己身所悔殃覺及為地獄餓鬼畜生在於五趣一切眾生罪所蔽者今吾皆以五體代受而為悔過曉了微妙除諸限礙已能遊入觀一切法譬如虛空所可悔者無罪無報亦無塵染已入

文殊師利曰悔此一切眾罪過已尋發無上正真道意請為一切眾生之類除諸殃覺使無罪蓋令在世間成佛正真莫為聲聞緣覺之乘開化眾生諸求度者吾當度之諸未脫者吾當脫之諸求滅度者當滅度之為一切人救濟之宅擁護自歸導示道徑將順燈明光明之曜為眾將師賈人大導以是如來十種之力尋發意頃令得莊嚴四無所畏三十有二大人之相八十種好如來音響八部之聲明識如來善權方便入眾生心佛之弘廣無上大慧在於法界禁戒清淨無有缺漏而雨諸法金剛章句不捨一切群生之類則不退轉究竟得至於一切智諸通之慧興正真心於諸佛法而無所著以諸德本勸助諸佛過去當來今現在佛本行學道從初發意至於無上正真之道成最正覺於此中間所顯德本如佛所教一切諸法則無根原亦無所住所施捨者而無所施本性清淨禁戒鮮潔乃無所犯眾生盡索而無所起乃曰為忍靜默無

作乃為精進，其心自然而無所生，乃為一心。度無所度，不越駛水，棄諸邪見，乃為智慧。入於深遠，十二緣起而無所入，乃可堪任，名為玄妙。明達行空，乃為慈心。作無所作，乃曰為哀。不行諸法，乃曰為喜。若越四瀆而無有二，乃曰為護。無受不受，亦無所攝，乃為四恩。無有根本，亦無所住，乃為德本。名曰五根，意無所念，亦無所遊，乃為五力。覺了真諦，一切本末，為七覺意。不合於二，無合無散，乃曰道矣。獲致之然，澹泊之行，乃曰為寂。以慧解度，不違柔順，乃曰為觀。以慧為黨，乃曰神通。吾皆以此勸助歸趣，不退轉輪，等御至佛。所以如來具足莊嚴，成就其身，則以此義演文字說。隨諸眾生言語音響，為分別解。所可頒宣，靡不周遍。無能抑制，所以如來於十種力，常得自在。以慧莊嚴而得成就，示現一切諸佛變化，無上無極。最尊無比，為無等倫。我皆勸助如是法行。其有過去當來現在諸佛，世尊本清淨身，而解自然，悉不可得。所言清淨，其心清淨，亦不可得。無所發遣，供養諸佛，於一切法，無所將護。乃為護法。無德無眾，為供養僧，皆已備悉。威儀禮節，亦以成就一切諸行。其行如是，并及餘事。而曉去來現在諸佛，道慧平等。等行佛法，不誤墮於一切眾魔，不與諸法而俱同塵。不著聲聞辟支佛地，斷絕諸非奉度，無極。逮得總持，修菩薩行，速近於道。悉能報答眾生所言，恣隨眾人之所欲，各令得所。常住平等所行，由己莊嚴一切諸佛國土，辯才光曜，歸于清淨，斷諸惡趣，三昧自在，恣隨一切眾生。

所為得諸總持，靡不照明。辯才聖達，皆當從己。則以所發一切智心，悉用勸助諸佛道慧。其諸過去當來現在，逮得佛道，無有眾漏。戒定慧解度，知見事周遊，諸力無能退轉。緣無所畏，諸佛之法，無所罣礙。其無極慈行，無等倫。其大哀者，不戴仰人，等如虛空，無能察頂。無二功德報應之相，清淨蠲除迷惑之心。而自莊嚴其身口意，諸天釋梵，普來勸助。敷演道教，而轉法輪，棄去無智不達神識，化諸眾生，建立佛慧。吾悉勸助，使至於佛無上大道。其有去來今現在佛，臨滅度時，善權方便，威神建立，流布舍利，令人供養，攝取一切眾生志性，從始至終，乃能至于正法滅盡。我皆勸助，所可勸助，志於佛慧，無上大道。去來現在諸佛，世尊現於滅度，合會聲聞過諸罣礙，導御篤信，解法界味，導御法念，度於八邪。所謂八等住於無為種性之地，其種性眾，而反其流，至須陀洹。二反周旋，為斯陀含。沒此生彼，不復迴還，為阿那含。無為無起，無所復進，為阿羅漢。分別曉了深妙緣起，十二之因為辟支佛。目悉通見慧，靡不達者，為諸菩薩。初發意者，心等如地。普入眾行，所行真諦，窮盡生死諸法之原，具足佛法，為不退轉。於一切生而無所生，乃能逮入一生補處。講說宣暢，無所無慧，而奮大光。諸所德本，悉無根本，亦無所住。吾悉勸助，如是像法，志於佛慧，無上大道。其有去來及今現在，三世之中，眾生之類，淨諸佛眼，所可布施，不計吾我，無所貪愛。所作功德，禁戒無盡，不可限量。所修道義，其行無行，所

有功德，悉以勸助諸佛之慧，無上大道，而不差別。等無所損，清淨離穢，猶如虛空，入於殊妙智慧。眾聖，則為最上導御眾義，精進行法。自然如空，真實無比，亦如無為，便無有侶。以是勸助，取要言之，如去來今諸佛世尊，本為菩薩行求道時，所行無量智度，無極。善權方便，無所罣礙。真實之行，善修清淨，行清淨已，證取佛慧。所可勸助眾德之本，方當勸助。吾當學此所尊修法，而效勸助，志於佛慧，無上大道。使諸眾生，如十方界，滿中諸塵，身所行事，一切見佛，悉令發心，不可計會。解於大道，自在所行。吾悉勸助，斯眾德本。了此德本，不可捉持。一切諸法，猶如虛空，若能勸助，此德本已，則無有本。已離諸本，不可護持。無所志念，寂然無生，達無生，已便入諸法。已入諸法，便勸德本。如為己身，所可勸助，亦復勸助一切菩薩。開化眾生，俱復如是。等無差特，是族姓子。菩薩大士，勸助佛慧，順而無失，乃至大道。復次族姓子，菩薩大士，所住如此深妙大義，然復口宣斯之，言教。其有十方，不可稱計諸佛世尊，在其世界，逮得無上正真之道，成最正覺。曉了經典，過於四魔，逮成無獲。澹泊之法，皆離文字，應聖二事。如所逮法，而復觀察。善權方便，示現受法。開化所應，可度眾生。不失大哀，稽首請問。樂於靜寂，觀彼佛樹，為諸天龍神，捷沓，想所見，諮嗟，解了音響，言語文辭，為一切說。若立此行，則能降伏魔及官屬。化諸怨敵，令無刺棘。所曰刺棘，三毒之謂。具足所願，輒如所念。滅除矇冥，則成世間無極。

弘曜聖慧之明入於無量。分別聰達道靡不通。其智慧輪莫能遏毀。行權方便暢識一切眾生根本。為說經法莫能抑制。而皆斷絕一切處所閉結之行。照見群黎所欲咨受。五體投地稽首諸佛尊敬歸命。為勝為殊為最第一。為無等倫無有過上。不有譬喻無可為侶。佛之智慧如是難及。觀無二際。我如此禮。乃為禮佛。無所從生亦無所至。為忍辱禮首悔殃。以稽首佛悔過自歸。殃罪消索雲除日出。假使無量十方一切所有世界滿中眾塵。如此之數眾生之類。口所宣說發心之頃。思念諸想不可計會。勸助諸佛令轉法輪。此諸世尊轉無上輪。至無二輪無有形相。無成就輪不可得輪。裂壞一切魔羅網輪。久遠已來覺無從生。逮致大道而寤起輪。開化眾生嚴淨十方諸佛土輪。於一切智多所摧伏。力無能勝入此道輪。曉了於空無相願輪。無所行輪。亦無所生無有起輪。悉無所有如真諦輪。所可成就無所成輪。有可降伏無所度輪。深奧微妙解於十二緣起之輪。破壞眾魔却外敵輪。消除迷惑危害怨賊。搥不可逮無極法鼓。亦復吹於無言法蠡。則亦豎立法慧之幢。而智聖慧解脫大明。而炳然熾無極錠燎。尋則雨於無量甘露。法滂之水可悅眾生。及賢聖智無上大道。以正七覺而飽滿之。滅盡一切眾生之類。生老病死愁憂啼哭惱不可意。結網之礙。窈冥晦蔽樹之根栽。故曰然於智慧之明無極大燈。則隨眾生本所為業。罪福果報各為現說。是諸世尊在於無數不可計

會十方世界。而作佛事善示法律。不斷言教諦分別慧。亦復授於諸菩薩。莛堅住聖眾開化眾生。求於玄妙寂然無為。啟受經典而無厭足。諸佛大聖欲滅度者。我悉勸助令不滅度。專志一心所行安隱。順住法界而常永存。無央數姪不可稱計。阿僧祇劫教化眾生。住六波羅蜜所度無餘。一人不度終不捨去。普令入於諸總持門。皆見一切諸佛三昧因行之始。若種正義立於大定。勸志大乘。遣至一切諸佛世界。而為顯示。諸佛世尊從無所生。輒逮成道。現有所生實無所生。其無所滅亦復如是。乃有所滅自然寂靜。悉無所著。是為族姓子。菩薩大士勸助佛慧而無罪覺。文殊師利言。已能如是悔所犯過。當發無上正真道意。常以慈心向於眾生。不懷怨結。已無怨望。請召三界勸助一切眾德之本。稽首諸佛歸命悔過。勸助轉法輪。示現無量所建立德。則當興發薩芸若智。諸通敏慧。十方世界無所係屬。琦珍異寶。花鬘雜香。擣香澤香。燈火衣服。幢蓋繒綵。伎樂不鼓。自鳴宮殿浴池。河海泉原。日月光明。無君主者。亦無敢名。吾目自見。而心取此。持以貢上諸世光耀佛天中天。以此眾養奇寶異珍。奉事諸佛。三界所有天上世間七寶樹木。自然瑰琦華香。天樂床臥。復上諸佛。供養已訖。曉了諸佛解一同等。諸佛無二。無有形容三十二相八十種好。而現相好。善權方便。示無量色。有所演說音聲。遠聞化無數身。不可計像。於諸世界而無所處。不住法界。以懷誠信。因緣解脫。所可

供養奉侍之德。以貢諸佛。是諸世尊於諸法界而不動搖。不得諸度無極處所。入無罣礙所。至無際。察於眾生五陰之體。猶如曠野。而無有主。悉無所有。不曉了此唐為憂患。化眾生類。志薩芸若。諸通之慧。普入眾行。取如來身。所入行者。悉捨有無。顯現眾生人之境界。使無憍慢。轉佛法輪。無有放逸。皆棄調戲。抑制眾魔。人民志性不可限量。斷除諸根。為現無量。一切眾生處諸羅網。而以道力廣示其義。平等之事。無陰蓋本。亦不動搖。悉皆興發。宣示普門。具足逮成薩芸若慧。淨修諸佛功德之德。莊嚴其身。供養舍利。以此燈香眾華。雜馨諸所供具。眾養之德。以貢諸佛世之光曜。如諸菩薩過去佛時。若干供養心無所著。以貢諸佛。吾亦如之。建立勸助。唯諸大聖垂以大慈。見愍納受。文殊師利曰。復次族姓子。菩薩大士所住若茲。當說此言。吾所悔過。則虛不實。所可勸助。亦無所生。所可請問。亦無所有。計此所悔。虛無實也。設我所勸。無所生者。所可請問。無所有。已道亦如是。虛無所有。其無所生。無所有者。等定亦如是。無所生。無有度者。無著無念。已無所著。則能信脫。無著勸助。所首悔過功德之品。計於道心。一切眾生。於無罪福。而得自在。本所勸助。皆以德本。供養一切諸如來眾。稽首歸命。貢上燈香。花蓋瓔珞。若干種物。所供養者。取此功德。皆為一味清淨之行。所清淨者。本性清淨。鮮潔顯曜等一切智。以為大施無極之業。仁和無穢等行於道。所願合集。當令歸趣。如來之道。則

用勸助無上正真為最正覺。一切諸法無所勸助。假使以眼不勸助色。了色自然不以眼著。因緣報應計如其識。所從起者不出於眼。亦無有色適起壞滅。消散盡索亦無住處。耳聲鼻舌味身更心法。所勸亦然意無有法。諸所功德亦復如是。勸助於道道無德本。有從德本而興因緣。因其所行而起心矣。所發道心亦無所住。適起尋壞消散滅盡。彼以其心而造德本。所可用心勸助行者。發心展轉而不相見。猶如燈火若晝日光無所從來。無所從去。適起生焰。因緣合成。忽不知處。菩薩道心亦復如是。智慧之明興顯德本亦無所住。其如是像以法生者。是為名曰菩薩勸助。入於寂然受決得忍。逮致聖光智慧之曜。假使菩薩遊於是法。心不樂行眾穢之元。諸佛世尊以為證明。乃當勸助志於德本。猶如諸佛智度無極。善權方便所因聖慧。令眾菩薩行於正德。所說勸助吾亦如之。而不動搖。精進若此。其道普至靡所不周。承志性力所入無量。亦皆棄除所應不應眾想之念。設已得入眾性行者。思念一切如來至真悉在目前。思惟虛空一切所有。等如虛無。已能可意。入於無量。思法界行。一切具足神通之慧昇自在。堂乃得申敘而顯其心。普悉棄捐世之垢穢。裂壞羅網。入於自誠。皆見十方佛天中天。諸菩薩眾無有遺脫。而不覩者。念於去來現在諸佛。悉為一等。則以德本勸助聖慧。吾今勸助如無二界一切普至。今此德本亦復如是。悉令周遍於諸群生。而得申敘。皆使得入

一切諸乘諸菩薩門所生之地。悉逮具足靡不覩念。令其眼根皆見眾生。究竟備悉無量。佛事盡入耳根。所可聽聞。一切天人。蜎飛蠕動。音響言聲。分別文字。所暢決慧。處處別異。教誨具足。眾生所作諸業。罪福所歸。從其所行而見果實。觀察三世去來今事。曉了眾生善分別行。解知所言。而皆識練。一切德本。無本無住亦無所行。乃為具足諸度無極。普見眾生而等導御。常以依倚無我本際。一切世人。悉欲樂往與共相見。在於世間無所罣礙。亦無坑塹。得第一度。思惟逮入斷一切法。皆得通入。於諸法界亦無所壞。其所遊居微妙真際。其有眾生在諸苦惱。令入佛土。觀諸刹土。悉是人界。逮得明眼。普見十方。悉承一切諸佛聖德。索察群黎。心性所趣。開導制御。罪蓋所為。如所教持。悉為示現成就自在。所奉道業順無從生。不乏四等四恩六度。以濟窮厄。令至弘廣殊特之慧。眾生志性各異不同。而使具足所欲志願。令無顛倒。得可其心。使懷悅豫。勢力奇特而無有侶。心已得閑。逮成正覺。目見眾生。性行所趣。各教化之。示現究竟。使菩薩行永存不斷。令諸眾生一切備悉。六度無極。住於正道。使無有餘。過去當來。今現在諸佛世尊。皆誨眾生。與得是處。無上大。道供養奉事。志性和雅。具足往詣。使得通入。無所行法。經道之輪。一切刹土。眾生徑路。有身形者。皆開化之。清徹悅豫。令不墮落。目見諸佛奉養歸命。以是德本。覩一切色。如見佛形。而皆等觀。十方刹土。則能嚴淨諸佛國土。

等察一切諸天人民。蚊行喘息。人物之類。諛諂虛偽。猶如幻化。普悉了斯。解無所有。等視三世。一發心頃。靡所不入。一切諸法。雖各別異。等無若干。入於道力。令一切法。至一平等。治無相好。等解善權。察眾生心。從其志性。委靡而隨。應病與藥。等授無上正真道慧。超度世俗。諸所為作。清淨鮮潔。歸于平等。洗除眾生塵勞。結恨穢濁。志操使徹。清明。歸此平等。便得歸於一切諸佛。悉一法身。逮成莊嚴。志習於此。柔順之法。遵修其行。精進勢力。慇懃不懈。欲有所度。以此德本。使十方人一發意。頃普達眾生。解告人民。諸菩薩行。皆令合集。言語辭意。以一發言。出無數教。示現眾生善權方便。一心念頃。各令見聞。平等道門。變化感動。靡不蒙濟。轉於法輪。舌能覆面上。至梵天。音聞遐方。如來身者。顯現道門。歡悅眾生。以一普安。演於無量若干光明。佛道巍巍。無有斷絕。一時顯揚。口宣十方五趣之處。示佛變化。悉令遊居。具足德行。為諸眾生。而訓誨現於斯德本。修於無量總持之門。入於光明巍巍之慧。令一切具靡不成就。人民所行眾德本者。志性各異。使入總持光明之慧。其有諸天。一切人民。愁憂苦惱。為除眾患。悉入總持光明之曜。一切諸論文字本際。入於總持光明之曜。一切諸行。諸想。所應。悉入總持光明之曜。使致普門。諸根轉輪。使入總持光明之門。一切莊嚴。清淨眾飾。使入總持光明之門。一切徑路。眾好威神。以悅眾人。悉入總持光明之門。無所罣礙。總持諸法。歸趣若干無

數威曜，悉使具足，皆令一切諸佛之法，悉逮得入，總持光明，以是德本，由此因緣，悉為諸佛所見，攝護，視於諸佛，如見父母，則以攝取佛之國土，修治嚴淨，為諸善友所見，攝取恭敬奉事，諸佛世尊，以若干種愛樂欣悅，心無變異，而不可動，攝取眾生，成就教誨，愛護一切諸惡趣，則以聖威斷惱根，攝取諸世顯發行執，懷善教一切典，所開化者，無導御，攝取諸法，欲以執持諷誦之故，用斯德本，因此緣報，住於一事，普見眾事，住於眾事，悉見一事，則以一事入一切事，以一切事入於一事，則以一義告誨，開化一切諸義，以一切義興發一義，以無因緣入於諸緣，化于諸緣，令入無緣，以無事法入于眾生，性行各異，從其相行而教誨之，以無有想入於諸想，諸未進者，悉令入道，入諸有想而誘進之，使入無想，以是德本，因此事故，由斯瑞應，住於一人，含氣之類，心性之行，普見一切眾生，意歸住於一切眾生，志性，則覩一人心意所趣，究竟具足，廣大其意，所誨無限，以一人心勸化，宣示一切眾生，意志所念，以一切心興發一心，則以諸佛威神感動，教化如應，開解一切眾生之行，誘一人心，勸入一切眾生，意行，以一切心勸入一心，化眾生，界勸進，暢示佛身光明，心存住於無人之際，於無人際，則不動搖，所建立處，不捨眾生，速度無極，而不懈倦，以是德本，修此事故，住一佛土，普見一切諸佛國界，住一切土，覩於一土，於一切土，入無盡土，於無量土，入於一土，無盡本際，莊嚴校飾，還淨國

土，訓誨所入，斷姪怒癡，靡所不散，住於一土，教化諸土，在於諸土，誘進一土，一切眾生，所念思想，勸至方面，發起人民，令一刹土，入一切土，以一國土，入於一切無量佛土，等見三界，眾生所興，不可動故，以無極哀開化人民，而無處所，亦無所住，若懷狐疑，悉濟猶豫，度眾生類，以是德本，以過去事入於過去，又以前去入於當來，又以過去入於現在，其當來事入於當來，又當來事入於過去，當來事者入於現在，又現在事入於現在，又現在事入於過去，一切過去當來現在，入平等相，令其現在入於現在，其現在者入於過去，其去來今，普入平等，以是德本，因緣之報，逮得諸佛，現在目前，三昧要慧，致成佛德，聖眾如來，三昧正定，逮致光明，華如來所化莊嚴三昧，皆莊嚴淨，所現三昧，示一切色所現身三昧，皆入諸音言辭三昧，又首楞嚴，現若千種般泥洹事，獲致不斷，佛教三昧，而當成就，專一嚴淨三昧，究竟善住三昧，定意金剛道場三昧，如金剛三昧，慧眼三昧，以是之比，見於一切眾生之心，所行若干志操，不同過去當來，今現在事，無所不達，乃為如來三昧道場，各各別異，令致于彼神通之慧，所願具足，以是德本，吾及眾生，悉使成就，進退自由，究竟清淨，被蒙開化，以是德本，一切眾生，目之根原，使如佛眼，一切世間眾生，所在諸可聞者，逮興佛耳，其聽無極，使眾生鼻得如佛鼻，通徹無際，悉無所著，令諸眾生，舌根德殊，逮得世尊廣長之舌，其所教誨，如佛之言，處在一切世

間之法，所作身事，所可興發，皆成佛身，處在一切法界之中，亦無所處，化於眾生，一切所作，行作佛慧業，從其人民，志性所願，應病與藥，而開化之，一切諸香，則能變為佛之德馨，熏為道事，一切諸味，則能化成為習義味，一切細滑柔和，內性入人義業，一切諸法，皆以訓導，使成道法，開化眾生，是為一切諸所入者，吾當令成諸佛所入，通達大慧，人民陰蓋，諸所情衰，吾當興法，消化諸衰，為作佛事，當使諸界，悉為佛界，所有諸根，令無有根，使乏根者，為立道根，以是德本，因此緣故，得至建立，無所住慧，聖道所處，所可建立，普令人民，皆悉曉之，化一切色，悉成佛形，由是之故，各各使人，曉了其慧，變諸音響，悉成佛聲，皆為人，民宣布道教，如是之比，使諸眾生，消除盡索，塵勞欲門，乃為菩薩，入諸菩薩，療治其行道法之門，是為清淨一切人民，志性事矣，可悅眾生，智慧之宅，入無勝地，勢力之土，菩薩道行，下於應時，而不違失，身行口言，意所修業，無所罣礙，不有危害，無所藏匿，頒宣諸佛之言教也，行不虛妄，逮得神通，所知具足，以是德本，當令我身及諸眾生，悉得成就，至於清淨，為人講說，是為菩薩，大士所行，勸助佛慧，真諦無失，文殊師利，說是五體悔過品時，五百菩薩，皆悉逮得，無所從生，法忍，皆以除棄，狐疑猶豫，虛偽閉結，倒見之惑，如來齊光照曜，菩薩，逮得一切諸佛，無所破壞，三昧之定，於是世尊，則以道耳，遙聞文殊師利之所講說，尋以讚曰：善哉善哉，仁快說此，除諸菩薩



聖礙罪蓋勸助入道，若有菩薩儻聞說此勸助教者，即能奉持諷誦講說，如是不久皆當滅盡一切罪蓋，令無罣礙。如燈及燭入於冥室，眾闇消索，猶如日出照于天下，靡不蒙明。如盲得目，聾者得聽，瘖者能言，跛者能行，塞者得通，五陰自消，六衰則滅，昇於法堂，入于道室，超慧臺閣，處大聖殿，何謂法堂？佛言：神通已暢，無所罣礙，逮三達智，何謂道室？佛言：得三昧定，見十方佛，如人照鏡，無有遠近，周遍悉見，何謂慧臺？佛言：智度無極，解一切空，心無所著，大慈大哀，何謂大殿？佛言：善權方便，進退知時，不在有為不處無為，與法身合，無合無散，現形三界，化為佛身，相好威容，頒宣道教，或為菩薩，聲聞緣覺，高士大聖，凡夫愚行，因時開化，度脫十方，莫不得濟，至于大道。佛說如是，如來齊光照曜菩薩，賢者阿難，諸天龍神，阿須倫，世間人民，莫不歡喜作禮而退。

### 佛說文殊師利淨律經

No. 460

西晉月氏國三藏竺法護譯

#### 真諦義品第一

聞如是，一時佛遊羅閱祇耆闍崛山中，與大比丘眾俱，比丘千二百五十，菩薩三萬二千，彼時世尊與無央數百千之眾，眷屬圍繞，而為說經，時有天子名曰寂順，律音在於會坐，即從坐起，更整衣服，長跪叉手，白世尊曰：文殊師利，今為所在，一切諸會四部之眾，天龍

鬼神釋梵四王，皆共渴仰，欲覩正士，咨講妙辭，聽受經義。佛言：東方去此萬佛國土，世界名寶氏，佛號寶英，如來無所著等正覺，今現在演說道教。文殊在彼，為諸菩薩大士之倫，宣示不及，天子白佛：惟願大聖加哀垂威，令文殊師利自屈到斯，所以者何？文殊師利所說經法，開發結礙，靡不燿然，踰過聲聞緣覺之上。文殊師利設說大法，一切眾魔皆為降伏，諸邪迷惑無得人便，諸外異道莫不歸命，其貢高者不懷自大，未發意者皆發道心，已發道心立不退轉，所當受者無不稽顙，所當執御靡不攬持，如來至真皆亦勸讚，因此聖教，乃令正法長得久存，自捨如來，未有他尊，智慧辯才，頒宣典誥，如文殊者也。

於是世尊見寂順律音天子之所啟白，為一切故，則發大哀，演兩眉間毛相之光，其明普照，照諸三千大千佛土，通達周徹，一萬佛土，大光照耀寶氏世界，時彼佛土諸菩薩眾，前問其佛：是何感應，先現此瑞？寶英如來告諸菩薩：西方去此過萬佛刹，有世界名忍，其佛號曰能仁，如來至真等正覺，今現在講法演眉間光，照萬佛土，普耀此刹。菩薩問曰：唯然世尊，何故放光？佛言：無央數億百千菩薩會，彼佛土釋梵持世及四部眾，皆共傾望，文殊師利欲得奉覲，咨講經法，悉俱白佛：奮斯光明，遙請文殊，寶英如來告文殊曰：汝往彼土，能仁如來，延企相待，眾會無不遲想相見，稽首思聞，欲聽稟受。文殊白佛：吾亦尋知此光，瑞應於時，文殊與萬菩薩禮寶英佛，右繞三

匝，猶如壯士屈伸臂頃，於寶氏刹忽然不現，立于忍土，在虛空中，不現其身，僉雨天花，遍大眾會，花至于膝，時諸會者，怪未曾有，皆白佛言：此何先瑞而雨天花？佛告諸族姓子：此文殊師利與萬菩薩，應命俱來，在于虛空，雨於眾花，以供養佛，眾會僉曰：願見文殊及諸菩薩，若能親覲，如是正士，甚為欣慶，難值難遇，說是未竟，文殊師利與萬菩薩，便即現身，稽首佛足，右繞七匝，各以威力神足變化，作大蓮華，自處其上，寂順律音天子白佛：願發聖教，令文殊師利敷演道化，眾會踳蹠，欲聞訓誨。佛告天子：自咨汝心，便可稽問，寂順律音則白文殊：寶英佛土有何奇特超異之德，至使仁者遊居樂彼？文殊告曰：不與貪欲亦不滅之，不起瞋恚亦無所盡，不建愚癡亦無所除，不造塵勞亦無所壞，所以者何？無所生法亦無所盡，又問：其佛說法，何所興為何所滅除？答曰：其本淨者以無起滅，不以生盡，所以者何？彼土眾生，了真諦義，以為元首，不以緣合為第一也。又問：何謂真諦元首？何謂緣合以為第一？答曰：於義無起亦無所壞，無有相處亦不無相，亦非一相亦不離相，亦不顯相，彼無視者亦不無視，亦不諦視，亦不有盡無能盡者，已無所盡不可盡者，是曰真諦義。義者，天子謂無心矣，無本心者不教他人，不於此際，不度彼岸，不在中流，是真諦義。義者，天子謂無文字，乃為聖諦，所以者何？如佛言曰：一切音聲皆為虛偽，天子又問：如來所說將無欺乎？文殊答曰：如來所說無誠無欺，所

以者何。如來於二心無所住。而於有為無為之法。無有言辭。由是之故。無誠無欺。於天子意所趣云何。如來之化。設有所說。為實為虛。答曰。不誠不欺。所以者何。如來之化。不有四。大亦無誠實。文殊答曰。如是天子。一切諸法。皆亦如化自然之行。如來所解。無所成就。亦無所住。以是之故。所宣講法。不誠不欺。歸于無二。又問。何謂如來說真諦義。文殊答曰。真諦義者。不可講說。所以者何。其義趣者。無言無說。亦不可得。說是真諦義時。五百比丘。漏盡意解。無數千人。遠塵離垢。於諸法。法眼淨。萬二千菩薩。逮得無所從生。法忍。

聖諦品第一

寂順律音。問文殊師利。其真諦義。甚為難解。文殊答曰。如是天子。其懈怠者。於真諦義。甚為難解。又問。何謂比丘精進。答曰。無所斷滅。亦無所除。而不修行。亦不取證。是為比丘奉行正義。所以者何。其自念言。斷滅如是。除去。若此修行。取證。則為壞想。顛倒。放逸。眾行。俱合。又計斯者。非正精進。又問。何謂正精進乎。答曰。其等無本。及與法界等。於五逆。亦復如是。如等無本。及與法界。於六十二邪見。亦如凡夫之法。學法。不學聲聞之法。緣一覺法。佛法亦如。如等佛法。生死之法。其泥洹法。愛欲塵勞。諍訟顛倒。亦復如是。比丘若茲精進行者。乃正精進。又問。何謂所行平等。如等佛法。及於愛欲塵勞之義。亦等諍訟顛倒之事。文殊答曰。用空無相無願等故。所以者何。空者。不別無有若干。猶如天子。坏瓦器內空。及與寶器之

內空者。俱同等空。無有若干。不可言二。如是天子。愛欲之空。及與諍訟顛倒之空。上至道空。彼則俱空。無有若干。不可名二。天子又問。何謂菩薩修行聖諦。文殊答曰。假使菩薩不行真諦。何因當為聲聞說法。所以者何。菩薩行諦。多所察護。聲聞無護。菩薩行諦。廣大難限。聲聞偏局。菩薩行諦。將護眾生。而於本際。無所造證。菩薩行諦。善權方便。不捨生死泥洹之門。菩薩行諦。普觀一切諸佛之法。猶如天子。有一士夫。竊捨大師。馳逸。奔走。獨身。無侶。心懷恐懼。渡於曠路。不敢復還。聲聞如是。意懷惶懼。怖畏生死。不護眾生。不能堪任。遊渡一切終始之患。獨自行諦。不護佛法。離權方便。無有慧侶。不亦然乎。猶如天子。謂彼大師。多獲盈利。齋無量寶瓊。琦異珍。賜眾賈人。超越曠嶮。菩薩如是。亦如大師。積行無量。道寶無限。修於大慈。無極之哀。真諦聖慧。饒益一切。無數辯智。以為傲富。遊一佛國。復遊一國。六度無極。攝行四恩。以濟危厄。矜救眾生。還入生死。善權方便。修行聖諦。度諸未度。解諸未解。周旋三界。獨步無侶。開化未聞。使入大乘。猶如天子。垢穢弊衣。以思夷華。黃白須曼。而用熏之。香氣不久。尋便歇盡。聲聞緣覺。行諦薄。亦復如是。便中滅度。不修所願。不至於佛。戒定慧。解度。知見事度。脫之香。亦復不能降伏。罣礙塵勞之欲。猶如天子。細孀妙衣。其價百千。以天殊特珍寶。諸華。百千萬歲。熏此好衣。其衣常香。香氣普流。巍巍芬馥。未曾有歇。諸天世人。皆所愛樂。菩薩如是。從無數劫

行諦法香。不具所願。不中滅度。而常演出。佛無上道。戒定慧。解度。知見馨。降伏罣礙塵勞之欲。遊於天上。及至人間。天龍鬼神。諸阿須倫。君子。庶民。莫不奉敬。而欲見者。恒弘濟度。寂順律音。天子復問文殊。其寶英。如來至真。佛土。聲聞之眾。為如何乎。文殊答曰。不御篤信。不從他教。不行於法。不毀法界。亦不八等。離於八邪。不須陀洹。皆度一切恐懼惡趣。非斯陀含。來化眾生。非阿那含。於一切法。無所往來。非阿羅漢。而皆受於三千世界。供養之利。不離於欲。亦不以欲。而見惱患。不離瞋恚。不以怒恨。而見焦然。不於眾生。而懷害心。亦無所憂。不離於癡。不以愚駭。而為危難。滅除窈冥。及一切法。不離塵勞。慙懃精進。化去一切眾。生愛欲。逮得高節。無所從生。而遊現生。於諸想念。開化眾生。不計吾我。及與人壽。悉無所受。亦無所捨。淨畢一切。人民所施。眾祐之德。無意無念。以修意止。奉四意。斷不起不滅。行四神足。身意寂然。遵于五根。曉了一切。眾生本源。行于五力。降伏塵勞。念於覺意。解平等慧。淨修道。教棄捐邪徑。證于道訓。不得無為。遊趣寂寞。而行本際。觀於所觀。僉入法界。滅於無明。盡于愚癡。興于聖慧。無上正真。而除於三解脫之品。則以肉眼。皆見眾生。一切佛土。諸佛世尊。所化人民。則以天眼。觀于五趣。生死往來。周旋人民。蝸蜚蠕動。蚊行喘息。形物之類。之所歸生。則以慧眼。察知一切。眾生之疇。心行所念。則以法眼。覩見三世。三界群萌。一切人民。所可行者。則以佛眼。皆用明觀。